

事文類聚

外集

七十五、七十六

左  
561  
2

漢書門			
六	一	二	六
一	五	三	六
一	〇	二	六
一	〇	二	六
冊	架	函	號

漢書			
六	一	二	六
一	五	三	六
一	〇	二	六
一	〇	二	六
冊	架	函	號

內閣文庫	
番號	漢 6126
冊數	61 ( 39 )
函號	365 31




綴じ部(喉部分)の文字など開きが不鮮明な箇所あり

事文類聚外集

五之六


三

2/75



館書圖京東			
一	二	一	類
册	號	架	書
			門
			類

不許借出



新編古今事文類聚卷之五

外集

南江富大用時可編

節使部

節度使

淺草文庫

歷代沿革

古方伯連帥之職後漢劉虞為幽

州牧就拜大司馬公孫瓚討烏桓

詔令授虞節度晉伐吳詔王濬受杜預王渾

節度唐自武德至天寶以前邊防之制其軍

城鎮守捉皆有使而道有大將一人曰大摠

管已而又曰大都督至太宗時行軍征討曰  
大摠管在其本道曰大都督自高宗永徽以  
後都督帶使持節者謂之節度使然猶未以  
名官景雲二年以賀拔延嗣充河西節度使  
自此以後接乎開元天寶之間朔方隴右河  
東河西諸鎮皆置節度使緣邊之地凡八節  
度外任之重無比焉至德以後天下用兵中  
原刺史亦循其例受節度之別若諸州在節  
度使內者皆節度焉宋節度使並兼管內觀  
察處置等使以本州刺史長史為節度觀察

等使不臨本部者以它官知判州府事防禦  
團練使刺史不赴本任亦如之故事節度使  
不帶使相位在卿監下至乾德五年升節度  
使班在龍墀內金吾將軍上無定負恩數與  
執政同初除鎖院降麻禮尤異焉祖宗以待  
宗室近屬外戚國壻年勞久次若外任除殿  
帥始授此官亦止一負或有功勳顯著任帥  
守於外及前宰執拜者不輕授政和以後官  
官秉節鉞者蓋八負戚里以濫恩破格橫遷  
者亦時有之政和二年詔節度使以下更不

帶持節字只稱某軍節度使元祐官品令節度使從三品

**大元**節度使正四品

**羣書要語**

元戎十乘詩摠元帥之任殿天子之邦六帖節制諸侯糾繩列郡。

重鎮雄藩。分麾授律。建牙大任。分關重寄。○轅門幕府。將星人傑。鎮撫方城。藩屏邦國。○外威夷狄。內撫黎元。作捍方隅。以獎王室。○有國柱石。予王瓜牙。旌旗重寄。河洛要衝。○蘊佐命之才。有經邦之任。○偶唐虞之代。

立方邵之勳並同上幢牙茸纛金節析羽旆旌

旗旒柳宗元集寵任麾鉞楊炎制入參廟筭出

摠師干李絳制授鉞開府殿我南邦白集設壇

而拜授鉞以征持衛義之印即拜軍中授岑彭

之節行於閩外元集初司戎鉞文集限守戎律

同上統節制之師貞否臧之律撫其四封率彼

五長常集除節度制旌惟進善節以詰奸同上

為王瓜牙為國藩垣韓愈上邢君牙書擁節摠

戎率身和衆劉禹錫集豹尾神旗橐兜戟纛韓

文龍旂四牡鉤膺鏤錫命服有煒先君載揚徐

集節度使碑

壽甲瑯戈涇師以往隼旗驚尾涇

俗以寧

涇原節度劉昌碑時昌為南邪王檢校

僕射

鐵鉞瑯戈乃主夏盟山玄朱組以靖蜀京

李國貞碑

再麾飄飄而出守十乘隱麟以啓行

常集

龍節蜺旌降於天上鸞書翠軸錫在掌中

同上

帥鉞將旄非功弗授曲阜制

**詩句**

紅旆將軍昨日歸白居易藩鎮例駟紅

旆

詔出未央宮登壇近摠戎上公周太保副相

漢司空弓抱關西月旂翻渭北風

岑參送李太

保克渭北節度

古今事實

賜之旌節

唐節度使掌總軍旅顛誅殺初授具帑秣兵仗

詣兵部辭見觀察使亦如之辭日賜雙旌雙節

行則建節樹六纛中官祖送次一驛輒上聞

唐

百官志

天寶中緣邊禦戎之地置八節度使受

命之日賜之旌節謂之節度使得以專制軍事

行則建節樹六纛外任之重無比焉

職官分紀

賜以樽勺

牛僧孺字思黯為山東道節度賜彘樽龍勺詔

曰精金古器以此况君子

親王遙領

開元中剡王除安北大都護充安撫河東關內隴右諸藩部落大使親王遙領節度自此始

宰相遙領

開元十四年河西節度副大使知節度使蕭嵩除同中書門下平章事節度如故宰相遙領節度自此始

父子更九鎮

唐柳仲郢父子更九鎮

同日踐兩鎮

李愬字元真帝方經畧隴右徙愬節度鳳翔李師道反詔愬武寧同日踐父兄兩鎮世以為榮

六遷大鎮

李晟克復京不易肆及愬平淮蔡復踵其美父子仍建大勲兄弟藉父勲寵率以弟宅相高惟愬六遷大鎮所處先人舊宅而已耳

四佩將印

王忠嗣為河西隴右節度使權朔方河東節度佩四將印勁兵重地控制萬里近世未有也



烏集祭戟

柳仲郢為太平軍節度使自拜諫議後每遷官  
群烏大集於昇平里第庭樹祭戟架皆滿凡五  
日而散詔下家人以為候除太平烏不集

持節就第

自至德後方鎮降拜必遣內使持幢節就第唐職林

入境築樓

唐節度使入境州縣築節樓迎以鼓角衙仗居  
前旌幢居中大將鳴珂一鉦鼓角居後州縣齋

印迎于道左視事三日洗印視其利闕歲以八  
月考其治否銷兵為上考足食為中考邊功為  
下考

卧護北門

裴度為河東節度帝命盧弘宣諭曰為朕卧護  
北門可也

堪當閫寄

唐元宗求良將委以河東河北之事問郭子儀  
子儀薦李光弼堪當閫寄

賞罰分明

封常清北庭都護持節伊西節度常清性勤儉耐勞苦出軍乘驟私廐裁二馬賞罰分明

威令簡肅

李愿元和初為銀州等節度使威令簡肅甚得綏懷之術

政更寬恕

王周歷貝州涇州節度使涇州張彥澤為政苛虐民多流亡周乃更寬恕問民疾苦去苛弊二十餘事民皆復歸歷四鎮皆有善政

政代寬簡

張洪靜徙節宣武承韓洪虐政代寬簡民便安之

秋毫無犯

郭子儀李晟為節度使收長安秋毫無所犯令嚴無犯

令狐彰拜滑毫魏博節度使當寇衝城邑墟榛彰躬訓吏下檢軍力農法令嚴無敢犯者田疇大闢庫委豐餘歲時貢賦如期

頗有治名

薛嵩相衛邢洺等州節度使方大亂後人亦厭

禍曷謹奉職頗有治名

更除繆政

安潛代高駢領西川節度使倚駢為奸利者潛  
誅之數年更除繆政

公退端居

段秀實拜涇原鄭穎節度使三四年間吐蕃不  
敢犯塞清約率易遠近稱之非公會不聽樂飲  
酒私室無妓媵無羸財退公之後端居靖慮而  
已

戎服待見

柳公綽使山南時牛僧孺罷相入江夏公綽具  
戎服於郵舍待之軍吏以漢上地高於鄂禮太  
過公綽曰竒章纔離台席方鎮重宰相是尊朝  
廷也竟以戎容見之

為治嚴稜

裴玠授同州節度元和三年徙山南東道玠為  
治嚴稜畏遠權勢不務貢奉蔬食弊衣居處取  
庇風雨而已倉庫充實百姓安之

未嘗贖索

徐申進嶺南節度使外蕃歲以珠璫瑁香天犀

浮海至申於常貢外未嘗贖索商賈饒盈

信懷義成

袁滋徙義成節度使滑用武地東有淄北魏博滋嚴備而推誠信務在懷來李師道田季安畏服之居七年百姓立祠祝祭本傳

威震兩河

郗士美討王承宗遣大將王獻督萬人為前鋒獻恣橫士美斬以徇下鼓之大破賊憲宗曰固知士美能辦吾事承宗大震懼會詔班師威震兩河

斬折七軍

高崇文元和初為右神策不行營節度使統諸鎮討西川劉闢至興元軍士有折旅店之匕箸者斬以徇初闢擒東川節度使李康及崇文克棣州而歸康求雪已罪崇文以康戰軍失守斬之

誅舞文吏

柳公綽為山南東道節度使行部至鄧縣有二吏犯法一賊緝一舞文縣令以公綽守法必殺賊吏獄具公綽判之曰賊吏犯法法在奸吏壞法法亡誅舞文者

斬朱泚使

韋臯為營田判官權知隴州留後事朱泚既僭遂令家僮使于臯又遣劉洵賓授臯鳳翔節度使臯俱斬以徇於是詔臯為御史大夫隴州刺史置奉義軍節度使以旌之

行守珪令

張九齡為相范陽節度使張守珪以裨將安祿山討奚契丹敗衄執送京師請行朝典九齡奏曰守珪軍令若行祿山不宜免死

許民它遷

張延賞為淮南節度歲旱民它遷吏禁之延賞曰拘此而斃不如適彼以生乃具舟遣之勅吏為修室廬已逋債而歸者更增於舊瓜步舟艫津湊而遙擊江南延賞請度屬揚州自是行無稽壅

禁俗不葬

李嵩檢校太原以北諸軍節度使太原俗為浮屠法死不葬以尸投山谷飼鳥獸號其地曰黃坑有狗數百頭習食齒頰為人患吏不敢禁嵩至遣捕群狗殺之申厲禁條遂革其風

西道遂通

李臯遷荆南節度使凡戰大小三十二取州五縣二十斬首三萬三千生擒萬六千未嘗敗師所過不敢伐桑棗踐禾稼朝廷仰食江淮而淮西道出九江至大別皆與賊接臯轉戰數千里餉路遂通江漢倚臯為固

南裔肅然

李復轉嶺南節度使時安南經略使高平正張應繼卒其佐李元度胡懷義等阻兵脅州縣肆為奸賊復至恟懷義杖死流元度南裔肅然教

民作陶瓦鑄諭蠻獠收瓊州致都督府

自擇留後

杜牧追咎長慶以來朝廷措置亡術復失山東鉅封劇鎮地大者連州十餘小者猶兼三四故兵驕則逐帥帥強則叛上或父死子握兵而不肯代取捨由於士卒往往自擇將吏號為留後以邀命於朝天子力不能制因而撫之謂之姑息之政姑息愈甚而兵將愈驕由是號令自出以相侵擊

唐兵志

號為債帥

唐忠武節度王沛死宰相裴度韋處厚以高瑀  
領忠武節度自大曆後擇帥悉出管軍中尉所  
輸貨者假貸富人既得所欲則推髓斲膏倍以  
酬息十償六七及瑀有命士夫相告曰韋裴作  
相天下無債帥

### 降麻非故事

唐制節度使除僕射尚書侍郎者謂之納節皆  
不降麻止舍人院草制宋天禧中丁謂自保信  
軍節度使除吏部尚書參知政事先公在西閭  
草制政和中韓公自武康軍節度使除工部尚  
書三司使降麻非故事也春明退朝

### 節度有三印

宋祥符中上覽河南節度使知許州石普奏狀  
用許州觀察印以問宰相王旦曰節度軍州有  
三印兵仗則節度判官掌書記推官署狀用節  
度印印之田職則觀察判官署狀用觀察印印  
之符制屬縣則大使判署用州印印之同上

### 三世節使

宋朝三世節度使一家吳璘子挺孫曦

### 四世節使

四世爲節度使二家錢忱高祖俶曾祖惟演父景臻鄭藻大父紳父成之子與裔

五世節使

五世爲節度使一家韓侂胄曾祖忠獻從子邈從孫同卿曾孫焱

父子建節

父子建節十三家劉光世父延慶錢忱父景臻邢煥子孝揚韋淵子謙吳玠子拱吳璘子挺郭浩孫杲楊存中子俊劉錡父武仲吳益子琚琨吳益子瓌吳挺子曦

兄弟建節

兄弟建節七家吳玠弟璘錢忱弟恂韋謙弟讜吳益弟盖吳拱弟挺吳琚弟瑒李孝友弟孝純

古今文集

雜著

代郭子儀謝副元帥河中節度使表

邵說

寄深匡輔任切安危寵命過臨憂皇如灼臣某中謝臣智術凡淺才略無聞承日月之光偶風雲之會自奉先帝狗以驅馳被甲即戎載罹寒



暑比憑朝筭克振天聲雖毫髮之功曾無足紀  
竟不能掃蕩妖孽使八方攸同謬踐中樞仍叨  
上將分茅錫社榮貫一時悽悽之誠竊自增愧  
今又猥蒙驅策出鎮河中授臣以連帥之權委  
臣以專征之務雖才輕方召而任此桓文此陛  
下除奸之時乃微臣死難之日竊觀自古忠義  
之士莫不扶危救禍憂國忘家雖在暮年猶思  
報主則廉頗強飯馬援據鞍以臣方之有甚前  
哲軍國事重不敢固辭誓竭股肱之力以副腹  
心之寄儻皇猷獲展寇難克平殞身戎行實無  
所恨無任感恩

代郭子儀謝河東節度使表

邵說

祇拜休命內揣薄才委任專崇周章失據臣某  
中謝臣聞邊之安危繫於所用事之成敗諒在  
先謀故寸璧必求良工尺錦亦資善製况夫謀  
無智勇備列戎旃自守封疆頗淹歲序肅將朝  
筭翦滅兇徒此乃天功匪惟臣力陛下不遺犬  
馬念以驅馳收其分寸之勞加以丘山之賞禮  
因位重恩與日深常恐顛危不克負荷所以非

有陳讓乞停范陽而手詔曲垂不蒙允許退就私室竊愧明時素飡之詩自臣攸作今又更承獎命兼以河東邊境相連三千餘里烽燧列警斥候須明雖則居安終資有備以臣獨制謂必無失然以能處一事身任一官猶擇其人且愧曠職况臣旁縮三節控帶數藩智有所不周心有所不及兵權倘失奔駟寧追實慮授受乖宜簡書是畏特望矜臣不逮察臣愚諛更選良能付以旄鉞則樵夫絕議官序有倫

謝浙西節度使表

顏真卿

聖德含弘不遺簪履捨其罪戾假以麾幢感戴恩榮死生知報臣其中謝臣以為全吳舊國分閩重權煮東海以自資塹西河而作固九州天險之地六代帝王之都是以魏文興嗟甘從南北之限符堅持衆爰喪百萬之師豈不以形勝是先腹心斯切親賢重寄鎮遏攸難矧在庸微寧堪及此是以拜命之日以榮為憂制書以今月四日至饒州臣以今日發赴本道取都統節度觀察使李峘處分訖即赴昇州即當繕修甲兵撫循將士觀察要害以備不虞假陛下英武

之威遵陛下聖明之理一心戮力上答天慈伏  
惟陛下察臣愚衷則死且不朽無任感戴屏營  
之至

代辭節度使表

汪藻

誤恩隆洽久蒙曠責之譏小已兢慚敢緩辭榮  
之請具翰愚懇仰冒隆威中謝伏念臣早濫褒  
揚侵階華近雖孤忠圖報誓糜殞以爲期然晚  
節知非悟滿盈之可戒昨侍言於帷幄祈休迹  
於田廬甫解繁機遽領異數以章句小儒而竊  
授方之寵以斗升素志而叨制祿之優方渙號  
之已行固牢辭而莫獲坐貪名器荐歷歲時若  
猶冒昧以自如將至顛隳而靡悔伏望 皇帝  
陛下特垂公聽俯諒忱辭鐫築壇節制之名守  
留鑰允釐之任豈獨少安於分願固將無累於  
恩私既聖度曲全諒保益謙之終吉况天威未  
遠敢忘歸美之餘忠

代薛門下辭免節度使表

汪藻

引疾辭榮方幸機衡之解疏恩越等遽蒙旄節  
之領凜如淵谷之臨莫測雲天之施輒布由衷

之懇仰干方命之誅伏念臣承學闕如起家寒  
甚早遂聖神之遇遂參丞弼之司黽勉十年周  
旋三省妨賢最久自知罪戾之盈容跡每安實  
賴恩憐之至比失衛生之理益懷誤國之憂力  
丐投閑僅蒙賜可所願退安於散秩敢圖併受  
於隆名惟齋鉞臨師本人主待有功之士而祠  
廷置使亦朝家優元老之臣顧平時猶懼於素  
餐豈病質乃堪於微使伏望 皇帝陛下不忘  
舊物深諒微忠量材能小大之宜盡庇覆始終  
之意特回渙號靡速煩言未泯餘生尚可筋骸  
之強誓堅晚節仰酬體貌之優

真定府總管謝表

張太傅

河朔雄藩戎昭重柄猥承選用俯愧踈愚蒞事  
方初撫躬增懼中謝伏念臣素無器業孤奉明  
恩自塵換秩之勞荐被董戎之寄西人外鎮累  
分經討之權北虜近邊即授撫綏之任曾微績  
效但擬僭尤顧擯棄以誠甘居冗散而為戒敢  
冀皇明下燭寒灰復然召從江海之濱再立軒  
墀之下仍分戎柄兼處兵衝一昨入侍禁廷及  
赴卑職將辭黼座親奉玉音憐其驅策辛勤察

其遷徙頻併許令今任且俾安居雖均勞逸之  
宜實被丁寧之誨此蓋伏遇 皇帝陛下熙隆  
寶運維御群才特推求舊之恩得展自新之效  
矧又不兼它局專治兵家惟紀律之素嚴寔詔  
條而慎守謹當愈堅誠節曲盡訓齊無事之秋  
使營而知勸臨敵之際則授命以忘身冀竭愚  
忠上酬恩造

河西節度使廳壁記 楊炎

皇帝肇建節制之任位以上將主四方之兵濟  
河而西五侯四將十有六縣大海磅礴乎終始

山河迴流其左右旄頭虎力之勁劍服窮廬之  
長煌煌乎長轂千乘橫合萬里皆主乎是邦故  
秦已上為戎都漢已下為巨防有城府襟帶焉  
有良將大勳焉有五都污雜焉其風悍其國險  
鮮車龍服囂然相蕩非古之戰守曷以成其業  
而樹其風者哉昔在武德之初上用雄武大才  
則我隴西李王肅明乎神化大冢宰宇文公駙  
馬喬公出將我前軍中興之後循吏繼作則館  
陶侯郭公鷄鳩氏司馬公相國韋公蕭公庶績  
交修以被昇平之化當今王室多故雲海沸騰

則僕射哥舒公以縱橫之奇判摠軍國其意者  
將復用雄武大才乎君子曰武德之官神以略  
其化威成中興之政儉以行其俗阜當今之理  
動以闔而人安宜乎盡天下之才隨質文之變  
以永來裔大康乎斯時天寶十二年夏六月記

邠州節度使廳記 鄭處晦

邠為古國其俗質而厚其人朴而易理業尚播  
種畜擾有后稷公劉之遺風始皇并天下地屬  
齊輔後漢析為新平郡後魏改置幽州國朝因  
之開元中詔以幽幽為疑因改為邠天寶已前

太平歲久西通伊涼萬里而遠邠實為近郡申  
王薛王以親賢之貴居之太尉房公以盛德之  
重居之洎逆胡勃起幽朔西戎塵坱湯湧乘難  
難際盜據河右蕃兵去王城不及五百里邠由  
是為邊郡斥候近郊鎮要害大曆中尚父汾陽  
王始以朔方軍壯其威容後益選武勇驍健有  
膽決奇謀者繼之今天子三年西戎款關獻河  
湟數州故地西鄙益託邠為近藩上念兵戎方  
息邊備愈遠始詔司空白公由丞相府持節來  
鎮丞相功成繼命文雅忠恕之風煦然而起邊

人若寢寤拭目心意蘇醒始知禮讓文化之爲  
急務廷議以我季父尚書公前爲夏帥夷昨又  
安寇盜弭息儲廩果實兵械果完懋賞休績遷  
鎮是軍季父又以理夏之政移之於邠邠人嬉  
嬉薰爲太和嘗觀屋壁志前帥是軍者之名氏  
因曰曩之帥此者豈不知是邠始務公車而角  
材堅壘未暇及此爾吾既承數君子大理之後  
敢不勤督吾之未至者况今戎醜既夷不宜獨  
以鳴鼓擊教擊刺爲事因命疏自開元已來刺  
是郡帥是軍者追書于屋壁季父尚書公曰吾  
思將有以警于吾前警于吾後者邠之土實婦  
人無桑績不能自衣朔方之軍雄男子勇於公  
戰無他業以自厚故郡之人以耕稼爲事軍之  
卒以勇敢得賞後之撫于人者宜勉農畝時其  
徵調人不擾而完富矣帥于軍者宜嚴其刑賞  
時其衣食卒不驕而勇敢矣人既完富卒既勇  
敢生聚之訓練之吾知青海之西不數年而內  
郡矣命處晦紀其始終序于前後處晦謹以季  
父之言志于後將永於後之人俾無怠大中二  
年三月日記

邠州節度使院壁記 李直方

自西漢始置幕府得顯辟士其聘舉之盛與公府置吏王國命官爲比於是班固傳毅崔駰蔡邕陳琳阮瑀之徒出焉大抵多巡禦封略經參戎事居無怙處秩靡常品故命之曰賓國朝篤方岳之任慎求其佐領以職貢爲之定制或辟自諸侯或降于朝廷皆命于天子其所司也調政教之和策軍筭之秘出入聘覲應對賓客其立署也行有戎次處有公堂與方伯周旋彌縫潤色而已王畿之腋劃爲巨防外殿朝那作捍西疆中拱皇都以臨諸夏滌沮之仁旣遠華夷之俗相猾非壞材英傑莫典封守非莊明純固莫參昨佐六年春皇帝勞韓侯牧圉之覲俾尹西夏申命御史中丞王君等九人爲之使介旣而師貞于律農勤其功惠和威武澤浸火烈孟秋述職曜兵河塞亭障蕭條千里晏清然後用虎旗虵矛定功于蒲入覲皇都增秩受賜旋師舊服勲明德舉非元臣雄略能賢嘉績茂用濟此先是尚父郭公開府是邦搜賢勿貳俊乂咸集不十數年持樞衡治邦憲司誥命者咸布



職於清朝今韓侯亦能詳延端士輔相威德則是府將來宜為駿賢之郊藪榮達之閭闕衛多君子邠其有之夫敬其事則命始春秋之誼也是邦當徵號朔方而以名師建為三郡肇基於我書事舉德宜始韓侯此記舊題於堂之北墉慮它日文字湮滅作者之文莫傳遂刻石以紀之李公自正字歷金吾掾廷評長安主簿遷監察殿中侍御史左司貲外郎今為韶州刺史某早與公游知公異時之大來也庶斯文之不泯貞元二十年十月日記

鎮海軍使院記

羅隱

惟天子建國必維九牧九牧既序區分局署兩漢三公府有掾屬魏晉而降則置行臺若魏以秦王儀鎮中都高齊以辛術監治東徐州事皆行臺之任也其官屬則今僕以至于尚書丞郎唐制由行臺而置採訪使殆今節制之始也鎮海軍舊治京口大丞相以錢塘之衆樞漢宏西殲逆朗天子不欲易其士故自符竹四命然後移軍於錢塘生以物宜租賦以便斥去舊址廣以新規廊開闕拔起階級俾幢節之氣色貌

武之出入得以周旋焉庚申年始闢大廳之西南以爲賓從宴息之所左界飛樓右廟嚴城地聳勢峻約而有敞肥楹巨棟間架相稱雕煥之下朱紫苒苒非若越之今而潤之舊也疆場之事則議之於斯聘好之禮則接之於斯生民之疾痛則啓之於斯軍旅賞罰則參之於斯非徒以酒食駢羅而語言嘲謔者也其府屬以下或八都舊將或從公于征或稟之於朝廷或拔之於鄉里故天子用青都傳道之選以佐之輟教民論道之任以副之其餘省秩卿曹職領相次自我朝藩服官屬之盛無加也噫大丞相之勲德既藏之天府而攀鱗附翼者非鐫刻樂石其可久乎是年冬十月始命觀察判官羅隱記

## 防禦使

歷代沿革

**唐**武后聖曆元年以夏州領防禦使防禦使之名自此始開元二年

薛訥爲隴右防禦使天寶中安祿山犯順大郡要地當賊衝者置防禦守捉使代宗授田承嗣魏博等州都防禦使大率防禦隸所治

州歲以八月考其治否以無虞為上考清苦  
為中考政成為下考宋沿唐制置諸州防禦  
使大元置諸路防禦使掌防制盜賊事

羣書要語

朕之腹心唐代宗永泰制兵防之  
任同上宜進厥位以稱禦侮之實

荆公除皇姪

制禦侮之寄曲阜除曲珍制列位

軍防淇水除皇伯克思制正名閑禦之任藥城

除曹評制爰昇扞防之秩龍溪制升軍禦之任

增使節之華胡文恭行李希及制

古今事實

虜不能犯

薛可言少帝即位遷澶州防禦使時虜寇魏博  
游騎晨夕至河上可言備豫有素虜不能犯

民皆便之

五代世宗時李瓊為安州防禦使治郡寬簡民  
皆便之吏民數百人詣監軍馮守規請立碑頌  
德詔中書舍人竇儀撰文賜之

州人立碑

郭瓊世宗時為齊州防禦使歲不登以俸錢分  
施饑民自隣境來者亦均給之人懷其惠相率

詣闕頌其德政立碑

郡人立碑

宋李漢超為齊州防禦使郡人愛之求為立德政碑太祖詔徐鉉撰文賜之

邊夷畫像

楊旼字延昭為防禦使屢有邊功天下稱揚為無敵夷虜皆畫其像而事之云以禦鬼疾

新編古今事文類聚卷之五

外集

新編古今事文類聚卷之六

外集

南江富大用時可編

統軍司部

都元帥

副元帥

歷代沿革

元帥舊無其名左傳晉作三軍謀元帥雖有元帥之稱而非官名後

周大象元年詔以上柱國為行軍元帥隋以

親王為之唐凡親王摠戎曰元帥文武官摠

統則曰總管高祖定京師置左右元帥太原

道行軍元帥西討元帥天寶末置天下兵馬  
元帥皆以親王領之又以大臣為副元帥大  
曆八年罷天下兵馬元帥建中四年以李希  
烈反置諸軍行營兵馬都元帥會昌中置靈  
夏六道元帥天復二年置諸道兵馬元帥尋  
復改曰天下兵馬元帥五代長興間加為天  
下兵馬大元帥錢俶在漢朝為東南面兵馬  
都元帥宋建隆元年加錢俶為天下兵馬大  
元帥大元立都元帥府掌征討之事有都元  
帥左右二副元帥左右二監軍又有檢法等  
負

羣書要語

方叔元老克壯其猷詩  
晉作三軍謀元帥左傳

古今事實

詩書元帥

晉作三軍謀元帥趙衰曰郤穀可臣亟聞其言  
矣說禮樂而敦詩書詩書義之府也禮樂德之  
則也德義利之本也

節度元勳

唐詔郭子儀李光弼等九節度之師討安慶緒

帝以子儀光弼俱是元勳難相統屬故不立元帥

征討元帥

唐禁王琬為征討元帥高仙芝為副琬素雅稱風格秀整時士庶咸服焉

撫軍元帥

唐寧王琰英毅有才畧善騎射每血戰在前時玄宗幸蜀留肅宗討賊至靈武肅宗即位欲以廣平王為元子以琰為兵馬元帥左右曰廣平今未冊立艱難時人猶屬望於元帥况太子從曰撫軍守曰監國今之元帥撫軍也廣平為宜遂以廣平為元帥

玉冊金印

同光中以錢鏐為天下兵馬都元帥尚父尚書令封吳越國王賜玉冊金印

手詔勅書

唐代宗即位內官程元振忌嫉宿將郭子儀巧行離間請罷副元帥子儀既謝恩上表進肅宗所賜前後詔勅因自陳訴曰陛下曲垂惠獎念及勤勞貽臣詔書一千餘首聖旨徽婉慰諭綢

繆彰微臣一時之功誠子孫萬代之寶自靈武河北河南彭原鄜坊河東鳳翔兩京絳州臣所經行賜手詔勅書凡二十卷昧死上進庶煩聽覽詔荅曰朕不德不明俾大臣憂疑朕之過也

臨軒授鉞

德宗幸山南以渾瑊充朔方邠寧振武等道兼永平軍奉天行營兵馬副元帥上臨軒授鉞用漢拜韓信故事

上樓行禮

唐郭子儀自涇陽入朝帝御安福門待之命子儀樓上行朝見之禮宴賜隆厚

圖凌煙閣

唐德宗初為天下兵馬元帥封魯王時史朝義據東都代宗遣德宗會諸軍大舉破賊於洛陽朝義走河北分命諸將追之俄而賊將斬朝義首以獻河北平以元帥功拜郭子儀等八人圖形于凌煙閣

創凌煙閣

昭宗末年中書奏西京舊有凌煙閣圖畫功臣今遷都洛陽合議修建副元帥梁王勳庸冠世

仍請凌煙閣側別創一閣以表殊勲從之

陳人退走

後周韋孝寬至淮南所在皆密送誠款謂五門尤爲險要陳人若開塘放水即津濟路絕孝寬遽守之陳刺史吳文立果遣決堰已無及於是陳人退走江北悉平

公拓授首

唐輔公拓據江東反命河間王孝恭爲行軍元帥擊之將發宴諸將取水忽化爲血在坐失色孝恭飲之曰此公拓授首之徵也衆服其識度後果擒公拓

有功遙統

開元十八年奚契丹犯塞肅宗時爲忠王乃授河北道元帥信王禕爲副帥御史大夫李朝隱等八摠管兵討之及諸將大破奚契丹肅宗以遙統之功加司徒

竟不臨戎

隋開皇十八年以漢王諒爲行軍元帥水陸三十萬伐高麗諒至遼水師遇疾疫不利而還十九年突厥犯塞又以諒爲行軍元帥竟不臨



戎

清河江神

隋楊素為行軍元帥伐陳素率水軍東下舟艦蔽江旌甲耀日素坐平乘大船容貌雄偉陳人望之曰清河公即江神也

兩浙尚父

唐詔曰朝廷每有將相恩命准往例列銜於勅牒後側書使字今兩浙節度使錢鏐是元帥尚父與使相名殊不合列署勅尾今後每署將相勅牒宜落下官位仍永為式

詔置寮屬

吳越正明三年詔授錢鏐諸道兵馬元帥四年置元帥府寮屬

遣誓將師

錢弘佐開運三年詔授東南兵馬都元帥李孺贊之求救也諸將皆不欲行弘佐因召文武官集議果言山水險惡不可興兵弘佐變色曰唇亡齒寒古之明戒吾為天下元帥豈不能恤隣若有異議者斬衆皆懾伏乃遣將誓師辭令明肅果有成功

# 監軍

## 歷代沿革

史記司馬穰苴請以寵臣為監軍

**後漢**光武使來歙監諸將**晉**武帝

以刺史為監軍**唐**以宦者為監軍**五代**後唐

亦有太原監軍**大元**都元帥府有元帥左右

二監軍亦掌征討之事

## 古今事實

### 銳卒遊軍

司馬文王征壽春使**軍**石苞簡銳卒為遊軍

魏志

### 褰帳撫帝

後唐張承業為太原監軍常從征討王師既退  
汴營大將周德威慮其奔衝堅請退舍帝怒垂  
帳而寢諸將咸詣監軍請承業遽至牙門褰帳  
而入撫帝曰此非安寢時周德威老將洞識兵  
勢姑務萬全不可忽帝蹶然而興曰予方思之  
其夕遂收軍五代史

### 斬狗驕貴

齊司馬穰苴將兵扞燕晉之師苴曰臣素卑賤

願得君之寵臣國之所尊以監軍景公使莊賈  
往苴興賈約會日中於軍門苴先馳至軍立表  
下漏賈素驕貴夕時乃至苴遂斬賈以徇三軍  
士皆震慄服之史記

### 懲踰法禁

張承業為太原監軍武皇屬以後事曰吾兒孤  
弱群庶縱橫後事公善籌之承業奉遺詔策畧  
居多莊宗感其意兄事之時諸王之貴介弟在  
晉陽宮或不以其道承業悉不聽踰法禁者必  
懲由是貴戚斂手

### 不與積錢

後唐莊宗時或有中傷監軍張承業於莊宗者  
言專弄威柄廣納賂遺莊宗歲時還晉陽官省  
太后嘗置酒命典聖宮使繼笈為承業起舞既  
罷承業出寶帶幣馬奉之莊宗指錢積謂承業  
曰和哥繼無錢使七哥與此一積寶馬非殊  
惠也承業謝曰郎君歌舞承業自出已俸錢此  
錢是大王庫物准擬支贍三軍不敢以公物為  
私禮也

### 自劾矯詔

宋均為監軍時將軍馬援征漢南臨水軍士多病均懼眾疾疫矯詔迫降之諸將莫應均力勒兵圍賊詐為詔而降之為置長史而歸自劾矯詔之罪帝善之

止可委官事

蕭復為相嘗言艱難以來始用宦者監軍權望太重是曹止可委官掖事兵要政機難使參領帝不聽

不得干軍要

李德裕為相先是韓全義敗於蔡杜叔良敗於陳皆宦人監軍制其權將不得專進退詔書一日三四下宰相不與又諸道銳兵驃士皆監軍取以自隨每督戰乘高建旗自表小不勝輒卷旗去大兵隨以北由是王師所向多敗至討回鶻澤潞德裕奏請詔書付宰司乃下監軍不得干軍要自是號令分明將乃有功

口毀子儀

唐九節度圍賊相州以魚朝恩為觀軍容使郭子儀有定天下功居人臣第一朝恩心媚之乘相州敗醜為詆譖肅宗不納其語然猶罷子儀

兵軍京師代宗立與程元振一口加毀帝未及  
寤子儀憂甚俄而吐蕃陷京師卒用其力王室  
再安朝恩內慙

### 天奪子布

張承業為太原監軍帝初獲玉璽諸將勸帝復  
唐正朔承業自太原急趨謁帝從容言曰今元  
凶未殄軍賊不克願殿下受人推戴悠悠之謀  
無益實事因泣下沾衿帝曰子非所願柰諸將  
何承業自是多病日加危篤卒於官凶聞至帝  
悲慟連日輟食因言曰天奪孤之子布也

## 招討使

副招討

### 歷代沿革

唐貞元時置招討使自後隨用兵  
權置兵罷則停後以節度兼支度

營田招討經畧使則有副使判官各一人

五代後唐亦以招討使為都統之副

宋因之  
元有招討使副招討

### 羣書要語

前命相臣招懷撫矜而誑誤示以  
生門期於盡脫網羅豈欲驅之陷  
穽而豺狼當道荆棘牽衣雖欲歸之於仁厥路

無由而至 元稹裴度制 一劔橫陣萬夫莫前陰  
則難窺勇則重閉亞夫緩急之任繼父絳侯祭  
遵禦侮之才為吾子路 一品集王宰制

古今事實

兼招討使

唐德宗初即位建中二年田悅圍邢州次臨洛  
詔河東節度使馬燧與昭義節度使李抱真神  
策將李晟合兵救臨洛悅兵大敗邢州圍亦解  
以功加右僕射尋又加燧魏博招討使三年又  
敗悅於洹水詔加魏州大都督府長史兼魏博  
等四州節度觀察招討使

讓招討名

裴度受淮西宣慰招討處置使詔出度以韓弘  
為淮西行營都統不欲更為招討請稱宣慰  
處置使從之

賊鋒屢挫

來瑱為潁川郡太守充招討使肅宗以瑱武畧  
尤加委任遷兼御史大夫比收河洛屢挫賊鋒  
頻來攻皆為瑱所敗賊等懼之號為來嚼鐵

籌畫皆出

五代後唐莊宗與郭崇韜謀討伐之計時明宗  
為諸道兵馬摠管當行崇韜自以宦者相傾欲  
立大功以制之乃奏曰魏王繼岌德望日崇大  
功未著宜依故事以親王為元帥莊宗曰小兒  
幼稚安能獨行卿當擇其副崇韜未奏莊宗曰  
無踰於卿乃以繼岌為都統崇韜為招討使率  
親軍六萬進討西川籌畫皆出崇韜繼岌承命而  
已

曰龍圖公

范仲淹知慶州兼經畧招討使未幾賊兵三萬  
叩城仲淹麾兵戰賊奔北遂戒諸將無追奔既  
而果有伏兵又奪馬為大順城及築細胥胡芦  
等塞招明珠滅臧二強族萬餘人及命環州种  
世衡招千餘人久之王師再喪於定川仲淹晝  
夜領兵為援初關輔人心動搖及見仲淹耀兵  
號令嚴明威震戎落人心遂安第相賀曰邊上  
自有龍圖公為長城吾屬何憂

慕郭代公

慶曆三年以鄭戩代仲淹為四路都招討置府  
於涇嘗慨然慕郭代公功業元昊擁眾臨黑山

戢勒兵巡邊抵鎮戎趨蓮花堡置酒高會旗幟  
絡野鏡鼓喧天虜衆十萬相顧不敢動元昊謂  
其下曰我已遣使稱臣朝廷何爲復用此公其  
畏如此

## 都統領

### 歷代沿革

**晉**孝武帝太元十九年有河西大  
**都統****唐**天寶末置爲天下兵馬元

帥都統朔方河東北平盧節度使都統之名  
始於此乾元元年戶部尚書李峘除都統淮

南江東西節度使宣慰觀察處置等使都統

之官始於此**唐**制或總五道或總三道上元

末省大中後討徐州以康承訓討黃巢以荆

王鐸爲都統黃巢之難置諸道行營都統掌

征伐兵罷則省雖總諸道兵馬不賜旌節**宋**

諸軍都統制者自渡江已前亦有之然未嘗

爲官稱蓋是時陝西河東三路皆以武臣職

高有智者爲馬步軍副都總管遇出師征討

則加以都統制軍馬之名非有司分也建炎

元年置御營司遂擢王襄愍爲都統制都統



制名官自此始大槩南渡置統制一則兵興稱謂不一諸路起兵有自稱統制者州縣管押勤王兵者亦有稱統制者諸道都總管及諸司便宜差統制者建炎初劉光世上言於是並罷惟中都主兵朝廷差充統制者仍舊紹興十一年韓世忠張浚岳飛除樞密副使罷宣撫司其統制將副並改充御前隸樞密院各帶御前字入銜其兵馬就令所部統制官節制而都統皆以屯駐名冠軍額之上獨川陝如故嘉定初蜀叛既平安觀文又奏分興州十軍為沔利三軍沔州除都統制利州除副都統制天下有十都統矣是年兀朮犯泗州詔樞密使張俊於鎮江府置司措置江淮守備俊發張憲事併岳飛賜死俊遂薦其將定遠軍節度使田師中掌故岳飛之兵又薦清遠軍節度使王德往金陵於是並詔為御前都統制師中於鄂州德於建康府駐劄其後大軍又有統制同統制副統制統領同統領副統領等其下乃有正將副將準備將之名皆偏裨也舊制準備而上自主帥陞差

仍先申樞密院定察紹熙四年詔江上陞差  
統制至準備將令主帥解發三人赴總領所  
內選一名慶元三年詔陞差並委主帥自是  
主帥之權復重矣大元統軍司有統軍使統  
軍副使及都統領統領副統領知事之職

**羣書要語**

元戎十乘以先啓行詩卻穀將上  
軍左傳長子帥師易梁弘御戎左

傳戎帥賜朱克融詔節將李御公集宜兼領護

之權副師貞之吉李若幽制執羈霸府盡忠肅

之勸誠聳劔元戎整旌麾之茂績張延師制折

衝之寄符玉帳而總金壇同上出摠戎麾杜佑

制分委戎輅作鎮孟津杜牧行李班冊授銅符

之律王縉制執戎鈴以泄衆杜黃裳制往持戎

律陳敬瑄制權握兵戎討董昌制建牙統衆必

藉雄才陸集劉洽制出統戎旃宋廣平集詔來

帥熊羆四方作儀翰父為戎臣師同上分命督

將保寧疆境開元戒勵州牧將誥

**詩句**弓箭圍狐兔韓百萬貔貅趨玉帳三千賓

客冠金貂羅隱上羅鄴玉

**古今事實**

出鎮河中

郭子儀上元初詔為諸道兵馬都統令奉諸鎮之師徑抵范陽詔下旬日為魚朝恩所間事竟不行永泰元年以子儀都統河南節度使行營出鎮河中分紀

蕩滌羣寇

乾符黃巢大掠江淮宰相王澤曰臣忝宰相之長在朝不足分陛下之憂願自率諸軍蕩滌群寇朝儀然之乃拜守司徒平章事荆南節度使諸道行營兵馬都統唐會要

意氣相期

太宗引尉遲敬德為右一府統軍右僕射屈突通咸言敬德初歸國家情志未附請殺之太宗曰寡人所見有異遽命釋之引入卧内賜與金寶謂曰丈夫以意氣相期勿以小疑介意寡人終不聽讒言以害忠良今以此物相資表一時共事之情也是日因從獵於榆窠遇王世充領步騎數萬來戰世充驍將軍單雄信領騎直趨太宗敬德躍馬大呼橫刺雄信墜馬敬德翼太宗以出賊圍太宗謂敬德功最多此眾人證公

必叛天誘我意獨保明之福善有徵何相報之  
速也特賜金銀一篋恩賜日隆

### 官序相當

德宗幸梁洋回初廢天威軍左右神策軍舉西  
漢謁者隨何下淮南功拜為中尉故事命神策  
監軍為中尉又以功臣數多或有秩至司空僕  
射罷鎮入朝無官序相當乃置六軍統軍秩視  
六尚書為節制迴翔之地分紀

### 拓臯敗虜

李顯宗字君錫兀术寇邊劉光世克三京等路  
宣撫使表公為本司前軍都統制上以宸翰賜  
公曰卿如立奇功與卿建節諸將會淮西戰于  
拓臯兀术大敗公追至孔城奪耄倪之被虜者  
以萬計言行錄

### 和尚原戰

丞相魏國張忠獻公浚兀术欲窺蜀公令陝西  
都統制吳玠於鳳翔府之和尚原先處戰地誘  
致其來兀术引眾十餘萬來犯玠與虜戰凡三  
十餘陣兀术中箭而遁俘其將羊哥字謹及酋  
領三百甲殺賊眾橫屍滿野兀术其眾損者過

半皆呻吟扶携以歸同上

大人洲戰

李顯忠時逆亮犯順公以池州都統移軍舒城除御營先鋒都統制埃騎報賊兵萬人渡淮公領趙康年等與虜戰于大人洲首挫其鋒乘勝掩擊過淮虜軍溺死者千餘人 同上

立功取節鉞

賊衆劉猗十萬已次于濠壽之間張浚拒之詔併以淮西軍屬浚沂中為張浚統制官浚遣沂中至泗州與浚合且使謂之曰上待統制厚宜及時立 勿取節鉞或有差跌浚不敢私錄 行

破賊復江州

和義楊郡王沂中傳李成叛江南招討使張浚議所以破賊王時為右軍統制官遂由上流徑絕生米渡出賊不意遇其先鋒擊退之賊將馬進銳卒數萬來犯浚率步兵攻其前沂中乃將騎數千與神武後軍統制陳思恭出山後前後夾擊乃大破之遂復江州 同上

古今文集

雜著

張韓公廟碑銘

李遐叔華

唐之元老有大庇於生人曰韓公公盡禮大朝  
位尊將相三城立廟軍帥乞靈則祠之天寶季  
歲華奉使朔方展敬祠下式瞻風采像與神合  
沉沉如生嗚呼生以公為臣歿以靈為神神乎  
宜奉公摠戎疆外懸衡審政拒隴循河繇亘萬  
里堅城雄防扞蔽三輔介冑之士垂十萬人瞻  
我麾節以為進退先是突厥犯塞乘勝入朔方  
游騎至安定官軍不到經畧失守虜乃驅監牧  
之騾牝退存廬帳進圍聚邑鳴弓躍馬規復漠  
南邊人搖心元聖軫念節將更至咸以為請搢  
紳獻議則以和親為便中宗未之許也初以公  
耄老且重煩之及卜師於太宮之庭唯公之吉  
至尊親臨前殿授以兵符公承命徂征北蕃逆  
駭記所謂君子有其時有其命公得其二而伸  
其一者也。公忠貫神明慮幾造化鎮以長策  
潰其奸謀一麾偏師屠名王復喪馬奪塹拂雲  
維而城之並阿之法列築三鎮將精士銳談笑  
就役匈奴莫敢南視雷哭而遁老幼望公以相  
震怖不然則乘冰轉鬪無日無之既而據河山

翫其動靜納行旅歸之裨席憑墉而望匹馬單  
兵不匿形影虜由是械手足而剗腹心朝廷無  
草竊之虞矣天下減征役之半矣詩云文武吉  
甫萬邦爲憲又曰方叔元老克壯其猷公之謂  
也帳下之廝尚有存者曰公號令素嚴人無違  
禁自將吏騎卒咸有旌表節不常出出則賞罰  
隨之賞無非功罰無非罪上流而下競心行而  
事從謀全功成由此術也三城既就刊木標櫓  
記之種落刻其降年後皆知之豈挺生上將之  
龜策也竒鑿先物之然也夫鳥獸草木出其倫  
輩猶或利害憑焉况殊績功勳終始天地翼輔  
先聖寵綏元元有茅社之尊符節之重後奉者  
果一勝遂一謀庸非聖明幽贊之效雅有吉甫  
薄伐至于太原王命南仲城彼朔方傳稱齊桓  
伐戎攘狄以其病燕滅衛魏絳和戎狄合諸侯  
從古及今以爲大功其餘秦恬漢青之倫纔丘  
垤爾尚或筮頌颺之簡冊貴之况忠武卓異屢  
復今昔而詠歌無之非古也竊感趙孟懷隨武  
之德寤寐永歎奉銘神宮其文曰  
赫爾韓公同武有經受命北伐渠魁就刑敢或

不順鼓行風霆崇岱壓卵滄波灌螢沉泉雷動  
機發冥冥功奮三城人謠億齡謀出先後構危  
於寧張天之威恢廟之靈北狄頓顙山戎來庭  
萬里寢柝緣河罷局趨拜故祠德謝惟馨翔野  
何有群山青青感激遺風徘徊涕零吾誰與歸  
式薦斯銘

○律詩

次潼關上都統相公 韓愈

暫辭堂印執兵權盡管諸軍破賊年冠蓋相望  
催入相待將功德格皇天

塞上贈王太尉

僧惠

飛將是驃姚行營已近遼河水堅度馬塞雪密  
藏鷗敗虜殘旗在全軍列帳遙傳呼更號令今  
夜取天驕

和聖製送石蒙都護兼鴻臚歸安西

王維

上卿增命服都護揚歸旆鳴笳瀚海曲按節陽  
關外落日下河源寒山爭秋塞無戰是天心天  
心同覆載

上裴行軍都統

耿緯



胡塵已滅天山外  
閉閣陰陰日復曛  
櫪上華駟嘶  
鼓角門前老將識  
風雲旌旗四面高  
秋見絲竹千家靜  
夜聞莫道古來多  
計策功成唯有李將軍

贈超將軍

孟郊

當年膽略已縱橫  
每見妖星氣不平  
身貴早登龍虎道  
功高自拔鹿頭城  
尋常得對論邊事  
委曲承恩掌內兵  
會取安西將報國  
凌煙閣上早書名

### 管軍總管

歷代沿革

魏黃初始置都督諸州軍事後周改都督諸軍事為總管武帝時以

王謙為益州總管之名始此隋文帝以并益

荆揚四州置大總管其餘總管府置於諸州

列為上中下三等加使持節煬帝改帥都督

為旅帥唐諸州復有總管亦加使持節刺史

亦加號持節武德初邊要之地亦置宋馬步

軍都總管以節度使充副總管以觀察以下

充有止一州者有數州為一路者有帶兩路

三路者或文臣知州則管勾軍馬事舊相重

臣亦為都總管 有禁兵駐泊其地者冠以駐  
泊之名 咸平廢三路都總管景德詔鎮定兩  
路併為一路諸路並去行營之名止為駐泊  
總管慶曆三年詔近分陝西緣邊為四路各  
置經略安撫招討等使自今路分總管鈐轄  
以上許與都總管司同議軍事路分都監以  
下並聽都總管等節制違者以軍法論七年  
析河北四路各置都總管一員如無亭止以  
安撫使總制諸路八年諸州部署並改總管  
兵馬總管副總管 總管舊曰部署英宗廟諱

改焉有兵馬總管副總管凡武臣以諸司使

以上充文臣以兩省五品以上充一州即為  
兵馬總管一路即為步軍總管副總管建炎

元年李綱言守備當於汭河汭淮汭江置帥  
府要郡以控扼其帥府文臣一員帶安撫使  
馬步軍都總管武臣一員充副總管改路分  
為副總管遇朝廷起兵則副總管為帥副鈐  
轄都監各以兵從出聽其節制正官願行者  
聽紹興二年要郡守臣罷帶兵職諸路副總  
管可依舊改充路分鈐轄五年密院言東南

多事合要近上官總領軍政乃詔兩浙江南  
荆湖福建廣東可依三路置總管於帥府七  
年淮東置總管十二年諸路並置州總管一  
負大元有管軍總管其下有管軍上千戶管  
軍中下千戶管軍總把管軍上中下百戶等  
負

古今事實

當今名將

太宗曰當今名將惟李勣薛萬徹江夏道宗而  
已以責丘道行軍總管伐高麗拔其城唐薛萬

任以藩岳

唐高祖詔黎州總管曹國公徐世勣本自黎陽  
擁徒歸順任以藩岳誠效克彰

遼東獻俘

李勣為遼東道行軍大總管率兵二萬執高藏  
男建等詔勣獻俘昭陵

定襄制敵

唐裴行儉為定襄道行軍大總管討之行儉曰  
以謀制敵可也因詐為糧車車伏壯士五輩又  
伏精兵踵其後虜果掠車壯士突出伏兵至殺

獲幾盡

箭定天山

唐薛仁貴副鄭仁恭為鐵勒道行軍總管將行宴內殿帝曰古善射有穿七札者卿試以五甲射焉一發洞貫九姓衆十餘萬令驍騎來挑戰仁貴發三矢輒殺三人虜氣懾皆降軍中歌曰將軍三箭定天山將士長歌入漢關九姓遂衰

俘滅三國

蘇烈字定方為神丘道大總管討百濟俘其王義慈等所滅三國皆生執其王

軟血敗羗

膠東王道彥從李靖擊吐谷渾詔為赤水道總管帝厚以利啖党項使為鄉導其首拓跋赤辭詣靖自言隋擊吐谷渾我資其軍而隋無信反見仇剽今將軍若無他我願資糧諸將與軟血遣之道彥至闊水見無備因掠其牛羊諸羗怨為赤辭所乘軍大敗

棄舟降銃

江夏王孝恭信州總管蕭銑據江陵俄進荆湘道總管統水陸十二軍發夷陵破銑二鎮縱戰

艦於江中諸將曰得舟當濟吾用棄之反資賊  
柰何孝恭曰銑之境南際嶺左薄洞庭地險士  
衆若城未拔而援至舟多何所用之今銑瀕江  
鎮戍見艦舟蔽江下必謂銑已敗不即進兵覘  
候往返以自救朝則吾拔江陵矣已而救兵到  
巴陵見船疑不進銑內外阻絕遂降

戰俘名王

李大亮爲河東道大總管出北道與虜遇蜀渾  
山大戰破之俘其名王

戰獲可汗

襄邑王神符遷并州總管顏利可汗盜邊神符  
與戰汾東斬級五百獲馬二千及戰沙河獲乙  
利達官得可汗所乘馬及鎧

擊下十城

李大亮擢金州總管府司馬王洪烈據襄陽詔  
大亮安撫樊鄧因圖之進擊下十餘城

進拔八城

契苾何力蓋蘇文死男子爲弟所逐使子詣闕  
降乃拜何力爲遼東道行軍大總管安撫大使  
經畧之副李勣同趨高麗勣已拔新城乘勝進

拔八城引兵還與勣會何力率兵五十萬先趨平壤虜其王以獻

### 便宜決事

裴寂受晉州道總管討賊以便宜決事賊將宋金剛據介州寂屯度索原賊埭水上流寂徒屯為賊所薄兵大潰

### 宣布恩意

李靖授嶺南撫慰大使檢校桂州總管以嶺海陋遠久不見德非震威武示禮義則無以變風即率兵東巡所過問疾苦延見長老宣布天子恩意遠近懽服

### 霹靂域內

唐長孫晟為秦川道行軍總管出討突厥晟斬千餘級有達官來降言突厥大畏長孫總管聞其弓聲可謂霹靂見其走馬稱為閃電晉王笑曰將軍震怒威行域內

分紀

### 蹀血虜庭

李靖為定襄道行軍大總管率勁騎三千由馬邑趣惡陽嶺頡利可汗大驚曰云云太宗曰靖以騎三千蹀血虜庭遂取定襄古未有鞏足澡

吾渭水之耻矣 唐職林志

召詔入朝

泉男生授平壤道行軍大總管兼持節安撫大  
使舉哥勿南蘇倉巖等城以降帝命舍人李虔  
繹就軍慰勞賜袍帶金鈿七事明年詔入朝所  
過州縣傳舍作歌吹右羽林將軍李同以飛騎  
迎寵

先登報國

唐張士貴正觀中為龔州道行軍總管太宗以  
其冒矢石先登勞之曰嘗聞以忠報國者不顧  
身於公見之

璽書褒勞

郭孝恪焉者王叛孝恪請擊之即拜西川道行  
軍總管率步騎三千出銀山道夜襲其王龍突  
騎支虜之帝悅降璽書褒勞

金瓶賜勞

秦叔寶事秦王府拜馬軍總管戰美良川破尉  
遲徵有功帝賜以黃金瓶勞曰卿不恤妻子而  
來歸我且又立功使朕肉可食當割以啖爾况  
子女玉帛乎

賦詩祖道

張仁愿為朔方軍總管春還朝秋復督軍備邊  
帝為賦詩祖道賞賚不貲

請斷石嶺

竇靜請斷石嶺以障塞突厥去入

勇冠三軍

薛萬鈞為沃沮道行軍總管從李靖討吐谷渾  
復馳進擊斬數千級勇冠三軍

職林

裂地獻俘

高麗莫離支男生為其弟所逐遣子乞師詔勣

為遼東道行軍總管率兵二萬討之破其國

長藏男建等裂其地州縣之詔勣獻俘昭陵

同上

銳士深入

侯君集李靖討吐谷渾以君集為磧石道行軍  
總管君集曰王師已至賊不據險天贊我也若  
以精兵掩不備彼不我虞必有大利靖然其計  
簡銳士約齎深入大戰破之

獨全軍歸

李靖為行軍總管以江淮兵萬人屯大谷時諸  
將多敗獨靖全軍歸俄權檢校安州大都督



率部落降

李勣為通漠道行軍總管出雲中與突厥戰走之引兵與李靖合因曰頡利若渡磧保於九姓果不可得我若約齊薄之不戰縛虜矣文靖喜以與已合於是率眾夜發勣勒兵從之頡利欲走磧勣前屯磧曰不得度由是酋長率部落五萬降于勣拜大都督府長史

決策深入

吐谷渾寇邊李靖往見房元齡曰吾雖老尚堪一行帝以為西海出軍大總管靖決策深入遂踰積石山大戰數千國人多降吐谷渾伏見自縊死

擊賊大奔

蘇烈擢伊麗道行軍大總管復征賀魯侯斤嬾獨祿擁眾萬帳降烈撫之賀魯率十姓兵十萬拒戰輕烈兵少舒左右翼包之烈令步卒據高攢稍外向賊三突步陣不能入因其亂擊之賊大奔

鬼章遂降

姚兕字武之為環慶路馬步軍副總管改鄜延

移鬼章據洮州謀言青唐欲將兵由講珠梁會于洮合寇我疆兇自河州率兵破六逋宗城夜遣驍將縱火講珠梁明日青唐兵至不得遂洮州之援鬼章遂降東都事畧

### 木征遂降

燕達為秦鳳路副總管河州景思立陷於踏白城達討山後諸羌斬首四千級還至訶若城木征遂降同上

### 總領軍政

見前公革

### 總治軍旅

哲宗正吏職官志總管鈐轄司掌總治軍旅屯戍營防守禦之政令凡將兵隸屬者訓練教閱賞罰之事皆掌之續會要

### 機速專行

熙寧中詔諸路如遇出入之本司兵馬機速事申稟不及者副總管得專行同上

### 機宜熟識

景德中以參政王欽若判天雄軍兼都總管初帝曰天雄且為重鎮思得熟識機宜行事果斷者泣之於是欽若請行分紀

燕達戰功

熙寧五年以燕達權發遣環慶路駐泊總管掌  
州之役達有戰功故自鈐轄躡遷總管然自資  
淺故令權發遣自燕達始也 實錄

狄青材勇

狄青字漢臣京師呼為狄天使上嘉其材勇為  
涇原路兵馬副總管上欲一見之詔令入朝會  
寇逼平原乃令亟往涇原俾圖像以進上觀其  
儀表曰朕之關張也於是有狄萬人之稱以敵  
萬人也

札授方畧

國朝淳化以參政趙昌言為川陝兩路兵馬都  
總管太宗以蜀寇尚有殘孽會昌言安撫招討  
仍賜御札數幅丁寧授以方畧委任雄盛 分紀

御賜秘畧

景祐四年以御製神武秘畧賜沿邊總管鈐轄  
每得代更相授之 同上

導裕知軍

熙寧五年上謂執政曰王韶經制鎰洮獨高導  
裕能叶力與都鈐轄如何王安石曰縱與權總

管亦無害蔡挺曰如此即當罷知通遠軍蓋自  
來無總管離帥府而知軍州者上曰有事宜即  
出駐劄使知軍亦何妨安石曰總管知軍與鈐  
轄何異亦不須舊制有無也乃以遵裕知通遠  
軍權熙河總管實錄

張劉再任

熙寧四年涇原路都總管張玉卨延劉永年並  
令再任玉與一子官樞密使文彥博曰兩人同  
是用而推恩不同上曰玉累有戰功永年但久  
熟卨延未有代之者若一槩推恩無以激勸

上言耶律惠

天聖七年劉平授忻州團練使屬上封事言趙  
元昊連姍耶律必為邊患授邠寧環慶副總管  
遣中人就賜黃金器

請持夏國臂

種子諤字子正李憲措置熙河邊事子諤卨延  
路副總管秉常為母所囚子諤入對大言曰夏  
國無人秉常孺子臣請持夏國臂而來神宗壯  
之東都事畧

古今文集

○律詩

奉和幸望春宮送朔方軍大總管張亶詩

李嶠

玉塞微驕子金符命老臣  
三軍張武旆萬乘餞  
行輪猛氣凌玄朔崇恩降紫宸  
投醪還約士辭第本忘身  
露下鷹初擊風高鴈欲賓  
方銷塞北役還靜漠南塵

獻丘常侍總管

許渾

詔遣將軍護北戎身騎白馬臂彤弓  
柳營還識金貂貴榆塞遙知玉帳雄  
秋檻鼓鼙驚朔雪曉波旌纛起邊風  
蓬萊每望平安信應奏班超定遠功

贈淮西賈兵馬使

釋清江


破虜功成百戰場天書新拜漢中郎  
映門旌旆春風起對客絃歌白日長

新編古今事文類聚卷之六

新編古今事文類聚

新編古今事文類聚卷之六


外集



事文類聚外集

七

四




76

館書圖京東				音
三	三	別	類	漢書門
册	號	架	插	書類

不許帶出





新編古今事文類聚卷之七

外集

南江富大用時可編

諸使司部

# 宣慰使

淺草文庫

## 歷代沿革

宣慰使始於唐初元和置淄青兗  
豫等州宣撫使後始置宣慰使大  
率藩方不靖則遣重臣宣諭慰安之故有宣  
慰使之名宋置宣諭使以宣諭德意為職而  
已不與軍事無宣慰官大元沿唐制置宣慰

古今事文類聚卷之七

使副使斷事官經歷知事等員

古今事實

持節直入

徐州張建封卒兵亂因監軍逼建封子愔主軍務帝以李鄴剛敢拜宣慰使持節直入其軍大會士諭以禍福出監軍獄中脫桎梏使復位愔即上表謝罪稱留後鄴曰非詔命安得輒稱之削去乃受既還稱旨遷郎中

行營面詰

憲宗因淮西久未成功遣尚書左丞許孟容行

營宣慰令面詰責光顏重胤一月內賊平

宣慰河北

王縉祿山亂擢太原少尹佐李光弼以功加憲部侍郎遷兵部史朝義平詔宣慰河北還有旨俄拜黃門侍郎同平章事鎮河東節度

本傳

宣慰魏博

田弘正圖魏博相衛具澶之地籍其人以獻憲宗美其誠詔充魏博節度使又遣裴度宣慰度明辨具陳朝廷厚意弘正不覺自失迺深相結納奉上益謹復請度徧行其部宣示天子恩詔

魏人由是歡服又裴度至魏博宣慰以錢百五十萬緡賞軍士六州百姓給復一年軍士受賜歡聲如雷並本傳

### 馬總副裴度

馬總副裴度宣慰淮西吳元濟擒為彰義節度留後蔡人習偽惡相掉訐獷戾有夷貊風總為設教令明賞罰磨治洗汰其俗一變本傳

### 巢父見田悅

孔巢父為魏博宣慰使巢父辨而才及見田悅與言君臣大義利害逆順時悅久不臣喜曰不

圖今日還為王人酒中悅起自陳騎射工曰陛下見用何敵不摧巢父曰若爾不早引歸乃一劇賊耳國方多虞待子而息數日田緒殺悅遂與大將邢曹俊等聽命巢父即以緒權知軍務紓其難無若孟陽

唐憲宗詔潘孟陽往江淮察諸使治否孟陽所至流連倡樂招金錢其後鄭放宣慰江淮帝譏之曰無若潘孟陽殫財費酣飲遊山寺而已

### 卒害真卿

盧杞德宗時拜同平章事既得志險賊浸露賢

者媚能者忌小忤已不置死地不止李希烈反  
杞素惡顏真卿挺正敢言即令宣慰其軍卒為  
賊害李揆有雅望畏復用遣為吐蕃會盟使卒  
于行天下無不痛憤以杞得君故不敢言 本傳

### 宣撫使

#### 歷代沿革

**唐**元和十四年淄青兗鄆等十二  
州平詔戶部侍郎楊於陵以本官  
充淄青等州宣撫使 **宋**祖宗時不常置有軍  
旅大事則命執政大臣為之累朝但除向文

簡范文正富文忠文忠烈韓獻肅五人仁宗  
征儂智高以狄青為宣撫使武臣宣撫自此  
始建炎三年張魏公以知樞密院為宣撫處  
置使其後杜丞相周仲弼孟富文趙元鎮虞  
彬甫王公明鄭仲一沈德之輩皆自二府出  
為之虞公始以元樞除大資政矣上恐未足  
為重後二日乃復帶知樞密院事焉若前宰  
相為宣撫則自渡江已後亦止除李伯紀呂  
元直朱藏一三人紹興元年劉光世以使相  
宣撫淮南武臣非執政而為之自此始二年

李恭發以端明殿學士為壽春等州宣撫使  
文臣非執政而為之自此始然自紹興至嘉  
泰武臣止劉光世韓世忠張俊岳飛吳璘從  
官止李光發王伯似二人蓋重之也 **大元** 仍  
唐宋制置之

**古今事實**

便宜行事

樞密直學士明鎬討貝州未下叅知政事文彥  
博請自往督戰以彥博為河北宣撫使彥博奏  
今在軍中請得便宜從事上許之閏月克貝州

擒王則

凍水記聞

節制諸將

鄭剛中字亨仲為川陝宣撫副使節制諸將極  
其尊嚴三都統每入謁必先庭揖然後就坐及  
吳璘升檢校少師來謝語主閹吏求講鈞敵之  
禮剛中曰少師雖尊猶都統制耳倘變常禮是  
廢軍容璘皇恐聽命 中興係年譜

活饑民

慶曆三年韓琦宣撫陝西屬歲大饑羣盜嘯聚  
悉討平之是歲河中同華等十餘州饑民相率

東徙選官發省倉以賑之蒲華同三州所活百  
五十四萬餘人他州稱是召琦歸闕

編年備要

### 修軍政

虞忠肅公允文為四川宣撫首劾大將任天錫  
剝下為苞苴又劾守令劉洪宋琛等十一人之  
病民者又薦可為將帥三人進偏禪二百餘人  
諸軍歡呼四蜀交賀於是開公平之路絕請謁  
之私而軍政修矣

言行錄

### 智高戰敗

狄武襄公青廣源州蠻儂智高叛連破七州仁

宗遣青為宣撫使率眾擊之至賓州時儂寇還  
守邕州青懼崑崙關為所據乃下令具五日糧  
休士卒賊謀知不為備是夜青率眾半夜度崑  
崙關近邕州賊方覺逆戰於歸仁鋪賊遂大敗

### 忠彥誅

李綱字伯紀為湖廣宣撫使有統制官張忠彥  
者駐軍廣州頗擾一路公為宣撫使召之不來  
公察忠彥樂為郡檄令權知岳陽忠彥果至即  
械送所司取旨誅之

並同上

### 僉書出鎮

治平三年以僉書郭逵宣撫陝西判渭州上曰  
第領樞職獨重使權自呂餘慶以參知政事知  
成都其後見任執政無守藩者至逵始以僉書  
出鎮

編年備要

御殿置宴

咸平三年詔兵部侍郎參知政事向敏中充河  
北東路沿邊宣撫大使樞密直學士馮拯陳堯  
叟充副大使巡按郡國存問官吏將校耆老百  
姓等真宗御長春殿置宴以遣之

就拜平章

韓康國公絳熙寧二年夏羌大入慶州境以公  
為陝州宣撫使自受命至陞辭三日而行贈金  
繒及織文袍纜至邊悉與將吏治兵廊延使和  
諤出青澗城公欲自高奴通道河東詔兼河東  
宣撫使就拜同中書門下平章事

言行錄

功出儒者

虞忠肅公允文字彬父逆亮叛順王權失律公  
以宣撫視師江上大破賊軍逆亮遁入揚州是  
日李顯忠至公曰京口無備我欲往公能分兵  
見助否顯忠即分李俸軍一萬六千人及戈船



百艘會于京口公至京口謁劉錡錡曰朝廷養  
兵三十年我輩一技不施今日大功乃出於一  
儒者我輩愧死矣同上

古今文集

○古詩

和錢王駿巡邊

張說

六月歌周雅三邊諗夏卿欲施攻戰法先作簡  
稽行禮樂知謀帥春秋識用兵一勞堪定國萬  
里即長城策布和戎利威傳破虜名軍前雨灑  
道樓上月臨營別藻瑤華降同衣錦褰榮關山  
由義近戈甲為恩輕絲竹路傍散風雲馬上生  
朝廷為吉甫邦國望君平

送鮑中丞赴太原

盧綸

暫趨西掖望全解北門憂專幕臨初護親營制  
督郵

送范司空赴朔方

呂溫

築壇登上將膝席委前籌虜滅南侵趾朝分北  
顧憂抗旌迴廣漢撫劔動旄頭

安撫使

歷代沿革

**梁**武帝普通六年魏以酈道元為大使慰撫六鎮大使始此**隋**文帝開皇九年詔遣柱國韋洸安撫嶺外又仁壽四年以楊素為并州道行軍總管河北道安撫大使**唐**正觀初遣大使十三人巡省天下諸州水旱則有巡察安撫存撫之名節度使兼之則有副使天授二年發十道存撫使聖曆中狄仁傑為河北道安撫德宗正元又置副使**宋**舊不常置自咸平二年以翰林學士王欽若為四川安撫使知制誥梁顥為陝西

安撫使安撫使之名始此其後景德三年始置河北沿邊安撫使以雄州守臣為之而陝西沿邊諸州亦有安撫使慶曆二年詔置湖南安撫司八年詔置河北四路安撫以韓琦王拱辰賈昌朝等充諸路使皇祐四年詔廣桂二州帶經畧安撫使熙寧五年罷諸路經畧安撫司崇寧二年置河南安撫使宣和二

年置輔郡內穎昌府帶京西安撫使宣和三

年臣僚言睦賊猖獗乞以杭越知州兼本路

安撫鎮撫一方詔杭越州江寧府守臣並帶

安撫使詔洪州守臣可依江寧府安撫使凡諸路安撫逐州知州兼以直秘閣以上充掌總護諸將統制軍旅察治奸宄以肅清一道凡兵民之政皆掌焉帥其屬而聽其獄訟頒其禁令定其賞罰稽其錢穀甲械出納之名籍其行以法若事難專決則具可否稟奏即干機速邊防及士卒抵罪則聽以便宜裁斷係邊任則綏御夷狄撫寧疆圉若甲兵屯戍芻粟餽運則視其緩急盈虛而移用之掌凡戰守之事建炎元年李綱請沿河沿淮沿江置安撫使兼馬步軍都總管以文臣充二年令將兵處知州帶管內安撫使後省四年置鎮撫使罷逐路安撫使後罷鎮撫使置安撫使如故時諸路又有安撫大使自兩浙西路劉光世始二品以上為帥即為安撫大使

**元**有安撫使又有副使正使正三品副使正四品

羣書要語

析圭建麾作牧

文選

當藩垣屏翰之任有弓矢

內有百揆四岳外有州牧侯伯

潘侯詩

千里之外設方伯

記受瑞

鈇鉞之權韓文送俱文珍序五都伯長送張童

子序方州大臣答元侍御書大夫烏公以鈇鉞

鎮河陽送温造序來帥熊羆四方作儀連理木

頌出咨岳政入填邦紀惠文太子冊繫我輔臣

泊茲列岳冊尊號赦尹正大都節度羣州皇甫

湜荆南判官廳壁記大旆高牙任雄節制楊億

代表代荷寵榮謬居垣翰李師道詔無安帥節

之樂猶待衮衣之選韓琦判相州制

**詩句**印綬歸台室旌旗別將壇韓愈李十八次

襄城分閫救世用賢豪趙公玉立高歌起杜近

來廊廟多西帥出相誰言只在東楊誠齋送丘

密帥蜀西蜀宣威百萬六會須號令自精明同

上京兆從教思廣漢會稽聊喜得方回東坡送

錢穆父守越

**古今事實**

士服威愛

程務挺以左衛大將軍為單于道安撫大使禦

突厥務挺善綏士服其威愛突厥憚不敢寇邊

唐會要

帝稱文武

儀鳳二年詔裴行儉為安撫大食一使歸至京師將吏為刻石碑葉城紀功帝勞曰行儉提孤軍深入萬里兵不血刃叛黨禽夷可謂文武兼備矣

職林

乞赦脅從

狄仁傑字懷英突厥入趙定標掠遁去拜仁傑河北安撫大使時民多脅從於賊仁傑願曲赦河北一切不問詔可

同上

許以便宜

馬儉為并州道安撫大使許以便宜

全活饑人

韓魏忠獻王琦益利路人饑為體量安撫使公至則蠲租減稅以募人入粟招募壯者刺以為廂禁軍檄劔門關民流移欲東者勿禁全活饑人百九十萬蜀人曰使者之來更生我也

體量官吏

范雍充陝西沿邊州軍體量安撫使詔所至察訪邊民利害及體量官吏能否

會要

大修戰陣

宋若水撰劉肅公珙謚議公鎮江陵條上兵少

財匱之狀除去詭名虛籍之弊大修部伍戰陣之法且謂襄陽兵戍久屯不歸為不便則立番休之制軍情大悅

### 大戢驕兵

程明道撰彭思永行狀云河朔謀帥以公鎮高陽時狃於承平治兵者鮮明紀律公為帥方重嚴正犯者頗以兵法從事驕兵大戢

### 錄問繫囚

咸平三年以翰林學士王欽若為并州道安撫大使知制誥梁顥為陝西路安撫使所使錄問繫囚真宗諭之曰朕觀省風俗尤難其人數日思之無易卿等各宜宣布德澤使知朕勤恤意

### 惠愛百姓

張忠定公燾外和內剛臨事有仁者之勇在蜀四年尤著惠愛百姓皆畫像以事後帥李璆贊云公昔在蜀千載一人公今去蜀千百其身願公再來以慰斯民蓋實錄也 周益公集

### 到部賑貧

韓康國獻肅公絳字子華江淮兩浙歲饑以公體量安撫江夏東西二路到部則發倉廩賑貧

乏問百姓疾苦

畫策弭盜

宰執奏福建安撫葉夢得措置弭盜之事上曰盜之竊發多緣守令非人培克所致宜令帥司條具凡有害於民者除之自此公或招或捕或誘之相戕三策並用

莫濬撰葉夢得行狀

畫像立祠

韓魏公所歷諸大鎮皆有遺愛人人畫像事之獨魏人立生祠為塑像歲時瞻奠比狄梁公戎狄尤畏公名凡使契丹及來使者必問韓侍中

安否言行錄

遮道拜泣

許汾知鄧州兼荆南西路安撫使政尚寬簡務為勸戒而人盡其情庭無留訟盖一本於誠信故人愛服之在鎮四年一路獄空者八十縣鄰路饑流詔公賑濟活二萬六千九百有奇去之日百姓遮道拜泣比之召父杜母而立祠于堂許龍圖行狀

錄諸將功狀

劉忠肅公珙巨寇李金奮起為亂以公為荆湖

南路安撫使公入境賊衆已數萬公檄隣道謹  
斥候守隘塞亟奏請下荆襄發卒又遣書制置  
使沈介請毋須報而亟遣介爲遣兵官軍日盛  
而賊勢日衰於是賊徒執李金以降首黨盡戮  
既乃錄諸將之功狀列上不以一毫有所私上  
嘉嘆再三璽書褒美

朱晦菴撰行狀

### 薦諸將可用

王文忠公堯臣元昊反以公爲陝西體量安撫  
使視四路山川險易還言某路宜益兵若干某  
路賊所不到某路宜急爲備至於薦諸將其可  
用者二十餘人後皆爲名將

言行錄

### 古今文集

雜著

代裴相公讓河南府道副元帥表

常衮

伏以東征之寄相宅之選皆周召之臣保釐統  
一也故二南風化見美詩人况洛邑經陸渾之  
戎有舊染之俗賴陛下發皇明以燭之布陽和  
以煦之流散稍歸傷痍甫起然備師居之任宜  
得經濟之才自河而南至于吳楚節制戎律半



於天下非宏略傑出功冠一時不可以專五侯  
九伯之征總衣裳兵車之會臣以衰朽薄劣待  
罪台司塵辱尸忝無裨朝政每趨宸陛益愧周  
行豈謂殊常之恩屢出非望注意之責并在微  
軀憂懼慙惶寸刻難措臣聞唯名與器不可假  
人審已量力未宜虛授若貪榮冒寵黽勉苟容  
神明昭昭必速其害伏望歷求百辟委之兼才  
以分二老之任用增元鼎之重則至公大行羣  
下知勸無任懇迫之至

辭免知福州安撫狀

真德秀

視邦選侯無越帥藩之重臨人涖政莫如鄉部  
之難兼此寵榮惕馬震懼伏念臣材非敏銳學  
最空疎兩朝千載之逢荐誇華顯一節四麾之  
寄蔑著勞能自撫舊邦偶承極弊邑有積年之  
預借州無旬日之宿儲重以公姓寔蕃廩祿弗  
繼內循薄技既初無鞭筭之長俯眊窮疇寧忍  
用箕歛之術輒效求芻之義冒干行葦之仁天  
憫皇宗歲領僧牒獲少寬於憂窘方勉竭於撫  
摩粗銷田里之歎愁即丐山林之間散未能底  
績遽已饗恩陞近職於文謨付中權於閩服顧

慙謏陋曷稱褒遷不稼取禾難追公言之誦維  
桑與梓更虞本道之嫌敢瀝忱辭冀回渙渥

論帥臣不可輕出 樓鑰

臣竊惟諸道置帥官稱安撫兼兵民之權有分  
閫之制朝廷選擇甚重不輕比年以來遇有盜  
賊竊發州縣所不能制者必使帥臣親行雖多  
成功臣竊慮此永旱饑饉既不能免潢池弄兵  
安保其無若自北以為故事帥臣動輒臨戎恐  
非國家之長策也仰惟 神宗皇帝垂意邊事  
廟謨深遠迺熙寧九年知成都府蔡延慶言乞

發陝西兵援茂州俟兵集自將以往令轉運司  
攝府事詔朝廷已遣將部兵延慶務在持重毋  
得輕去成都元豐六年河東經略司言西賊入  
麟州神堂寨知州訾虎等領兵出戰有功詔虎  
自今毋得輕易出入遇有寇邊止令裨將出兵  
揜逐 神宗之慮深矣蓋帥守之臣民之司命  
一有失宜衆心易動當令指授方畧調度軍食  
持重鎮撫以靖一方雖有挫衄根本不搖若使  
輕出利害實大蓋帥臣之行建牙郊野堪戰之  
士咸在行陣從行兵卒必是單弱而又隨宜遷

次登陟險隘脫有黠桀之盜伏隱篁竹乘間挺  
出以犯大帥之顏行則賊勢易張國威難振倉  
卒之頃可勝言哉故延慶有請既拒而不從訾  
虎成功亦因以切戒此臣平日之所慮適合信  
使之所傳無事而言似非時務愚者一得願效  
君前伏惟俯矜微悃曲留宸念臣幸甚

○古詩

呈王中丞廬院長 韓愈

聲明動朝闕光寵耀京洛旁午降絲綸中丞一擁  
鼓鐸江淮永清晏宇宙重開拓印從負鼎似門  
為登堙鑿再入更深巖又逢彌蹇謬賓筵盡狐  
趙舞騎多衛霍帶垂蒼玉佩轡盛黃金絡五門  
氣爭呼六竒心運度

送薛穎叔帥熙河 蘇子瞻

西方猶宿師論將不及我苟無深入計緩帶我  
亦可我欲歌杖杜楊柳方婀娜邊風事首虜所  
得蓋么麼願得魯連客一射聊城箭

送元厚之帥福州 王介甫

元侯文章翁更以吏能著今為大帥府千里來  
赴想銜詔出黎嶺方為遠人慕旌旗滿流水冠

蓋東門駐

○律詩

聞晉公自蔡州入覲 韓愈

南代旋師太華東  
天書夜到冊元功  
將軍舊壓一司貴  
相國新兼五等崇

贈淮西賈兵馬使 釋清江

破虜功成百戰場  
天書新拜漢中郎  
映門旌旆春風起  
對客絃歌白日長

送鄧漕移帥揚州二首

周必大

碧幢紅旆擁西風  
幾點淮山落眼中  
卧轍正看留使者  
褰帷早已識元戎  
兒童騎竹迎并牧  
父老封崇記召公  
人望汲鄉居禁闥  
淮陽只恐又匆匆

聞道維揚地望雄  
風流人物似江東  
六龍前日臨淮海  
五馬由來說醉翁  
壁月幾橋留夜色  
珠簾十里待春風  
遙知九日平山會  
笑插茱萸滿鬢紅

留別金陵韓帥 仲通 二首

周必大

十二麟符玉截肪腰間仍映帶圍黃化行江國  
春常早訟息階除日自長槐影緩趨三接書棠  
陰先滿十連堂子淵去踏長安道待賦中和奏  
未央  
再展賓筵又一暮千金敝帚賴提撕泮宮正采  
僖侯藻太學俄甘吏部壘人似塞鴻春向北心  
隨江水日潮西太平勲業須公助不用頻年戀  
節犀

送廣帥秩滿之官丹陽

楊廷秀

北門卽護要耆英小試曾中十萬兵天借金山  
唵落月身兼鐵甕作長城何如嶺上因歸路摘  
取梅酸去作羹已有紫泥教詣闕便應留住付  
釣衡

送朱師古龍圖少卿帥潼川

楊廷秀

壁水蓬山徧羽儀頌臺公府更光輝紫荷到眼  
垂持橐黃菊關心便拂衣鬻子運籌年尚少買  
臣衣繡日思歸小煩諭蜀須還報却袖香煙侍  
太微

錢洪帥張伯子移鎮京口

楊廷秀

夢入飛雲卷雨簾袖却築巖作霖手滕王閣上  
唐阿舒春生秋殺震江湖吏部未見張尚書春  
生儘有秋殺無江西十州百萬戶父非姓召母  
非杜

錢趙子直出帥益州 楊廷秀

欽水花潭照碧油西清學士舊黿頭隨身琴鶴  
如清獻治蜀功名更蜀侯

送趙德老端明帥蜀 樓鑰

身名俱泰老尚書叱馭寧辭萬里途兩地恩榮  
真赫奕四川父老定歡呼平崖袍帶今重見清  
獻琴龜我更無頻向籌邊樓上望歸來方略上  
新圖

送温州 蘇子瞻

威聲又數中興年二虜行當一矢聯聞道名城  
得真將故應驚羽落空弦追鋒歸去雄三衛授  
鉞重來定十連

送福建張比部 王介甫

畫船簫鼓出都時萬里驚人去不追却望塵沙

應駐節會逢山水即吟詩

贈馮楊帥

楊次公

天下無雙士淮南第一州文章老元帥節鉞古  
諸侯路穩歸黃閣功成建碧油風雲生鷄首蛟  
屢怯龍頭

和送朔方大總管李矯

玉塞微驕子金符命老臣三軍張武旆萬乘餞  
行輪猛氣凌玄朔崇恩降紫宸投醪還約士辭  
第本忘身露下鷹方擊風高鴈欲賓方銷北塞  
侵還靜漠南塵

送嚴黃門再鎮蜀川岑參

授鉞辭金殿承恩戀玉墀登壇漢主用講德蜀人思

送李中丞赴商州韓翃

當年紫髯將他日黑頭公不異金吾寵兼齊玉  
帳雄

上河陽李大夫蘇子瞻

上將秉神畧至兵無血威寒劔奪衆景夜星火  
長輝武牢鎖天關河橋紐地機

經畧使

歷代沿革

**唐**正觀二年邊州別置經畧使此蓋使名之起節度兼度支營田招

討經畧使則有副使判官各一人儀鳳二年以黑齒常之為河源軍經畧大使永淳元年婁師德為河源軍經畧副使至德三年賀蘭進明除嶺南五府經畧兼節度使建中元年除元琇節度始不帶五府經畧**宋**不常置咸平五年始以右僕射張齊賢為邠寧環慶路經畧使判汾州諸路軍馬並受節度又以鄧州觀察使錢若水為并代經畧使判并州自

後不除又寶元中夏人入寇始命陝西沿邊大將皆兼經畧皇祐間儂智高擾邊語知廣桂州並帶經畧安撫使自後西南二邊常帶經畧所以重帥權而服羗夷也其經畧安撫各以直秘閣以上充掌一路兵民之事皆帥其屬而聽其獄訟頒其禁令定其賞罰稽其錢穀甲械出納之名籍而行以法若事難專決則具可否稟奏即干機速邊防及士卒抵罪則聽以便宜裁斷帥臣任河東陝西嶺南路職任綏御戎夷則為經畧安撫使**南渡**之



初依舊制廣南東路帶主管經畧安撫司公  
事西路帶經畧安撫使紹興五年令襄陽守  
臣湖北帥帶經畧安撫使後罷而二廣如故  
**大元**經畧使正三品副使從四品經歷七品  
**詩句**英英桂林伯實惟文武才 韓愈二十四州  
民樂否莫教一物怨窮途 張孝祥 紅旗照海壓  
南荒徵入中臺作侍郎 韓退之 贈刑部馬侍郎  
斧鉞下青冥樓船過洞庭北風隨爽氣南斗避  
文星 杜甫送李大夫赴廣州

**古今事實**

威名流聞

戴叔倫為容管經畧使綏徠夷落威名流聞其  
治清明仁恕多方畧所至稱最德宗嘗賦中和  
節詩遣使者寵賜 唐職林

威聲風行

唐裴行立為安南經畧使威聲風行

綏定八州

唐元結為容管經畧使自諭蠻豪綏定八州民  
樂其教立石頌德

都督諸軍

元和十二年御史中丞裴公來莅茲邦都督二  
十七州諸軍州事盜息奸革德惠敷施暮年政  
成柳子厚桂州賀家洲亭記

管嶺外地

唐涼公房為涼州經畧管嶺外十三州之地稅  
節賦時公私有餘削衣貶食不立資遺以班親  
舊為友為義

平嶺表夷

唐王雄字宏肱大曆中為容管經畧使平嶺表  
夷獠代宗遣使慰勞加金紫光祿大夫

職林

恩被異域

宋朝余襄公帥二廣幾十年恩信被於異域如  
交趾大理特磨南詔之國皆可以頤指氣使公  
之文武之才可謂具矣

言行錄

德著夷夏

范文正公帥邠延涇慶四都恩德著聞夷夏聳  
服熟戶蕃部率稱曰龍圖老子至於元昊亦以  
此呼之

澠水燕談

外蕃貢珍

徐申字維降為邕管經略使黃洞納質供賦不

敢桀外蕃歲以珠璣瑁香文犀浮海至申於常  
賦外未嘗賸索商賈饒益

職林

### 寇攘順化

張公師為安南經畧使自為吏習於海邦去之  
則夷獠稱亂復至則寇攘順化及受命專征牧  
人盡區處之方制國備形體之法道阻而備百  
貨地偏而具五穀儲峙委積師旅無庚癸之呼  
繕完板榦控帶兼戊己之位皆用周禮率由漢  
儀易野之守險逾丘陵而萬世無虞奇珍良貨  
溢于王府殊俗異類盈于藁街優詔累旌其忠

良太史嗣書其功烈

唐職林

### 築城據要

范文正公為環慶路經畧安撫招討使於延州  
築青澗城墾營田復來平廢寨熟羌歸業數萬  
戶於慶州城大順以據要害奪賊地而耕之又  
城細腰胡廬於是明珠滅藏大族皆去賊為中  
國用

言行錄

### 弛禁通輸

劉徽猷子羽字彥修宣撫司移軍闡州吳玠戍  
河地王彥成金州二鎮皆饑而興元帥過為守

備閉關塞褒斜二鎮病之公乃承制拜公利路  
經畧兼知興元府公至之日盡弛其禁民饑通  
商輸粟二鎮乃安

言行錄

### 麾兵血戰

范仲淹知慶州兼經畧招討使未幾賊兵三萬  
叩城仲淹麾兵血戰賊奔而北久之种世衡不  
利於定州以仲淹晝夜為領兵援初關人心搖  
動及見仲淹耀兵號令嚴兵威震戎落人心遂  
安相賀曰邊上自有龍圖公為長城吾屬何憂

### 究馬治病

張敬夫經畧安撫廣南西路朝廷買馬橫山歲  
久弊積邊氓告病而馬不時至公究馬利病得  
六十餘條皆有以窮其根穴而事為之防由是  
諸蠻感悅爭以善馬來歲額率常先期以辦

朱晦菴集

### 移檄交趾

余襄公靖字安道嘉祐五年交趾寇邕州殺五  
巡檢驛召公以為廣西體量安撫使公至則移  
檄交趾召其臣費嘉祐詰責之嘉祐惶恐對曰  
種落犯邊罪當死願留取首惡以獻即械送五

人送欽州斬于界上言行錄

移文諭蜀

唐質肅公介知太原府河東經畧使至則首戒邊將毋生事初代州岢嵐軍虜數擾邊公遣兵撤其境上堡柵又移文諭以利害嚴守以待之遂不復敢動

元昊欽畏

鄭戩字天休為陝西經畧安撫招討使巡邊至鎮戎軍趨蓮花堡元昊方擁兵近塞謂其下曰我已遣人使稱臣朝廷何為行用此公護諸將

其欽畏如此東都事畧

蠻酋叩謝

李浩公字德遠為廣南西路帥有入對論擇帥事者上欣然顧之曰如廣西朕已得人矣李浩也公至鎮勤於民事郡舊有靈渠通漕運溉田甚廣歲頗湮塞公命疏治之民賴其利邕管所領羈縻安平州蠻酋恃險凶橫聚兵謀為邊患公遣單使開心見誠諭以禍福即日叩頭謝過焚撤水柵受約束曾李程撰李殿撰浩有狀

驚賊破膽

范仲淹與韓琦叶謀必欲外復靈夏橫山之地  
邊上謠曰軍中有一韓西賊聞之心膽寒軍中  
有一范西賊聞之驚破膽元昊大懼遂稱臣  
臣傳

得人死力

唐劉雍為隴右經畧使輕財愛士得人之死力

簡閱州兵

南軒先生張拭經畧安撫廣南西路所統州二  
十有五遼夏荒殘故多盜賊徼外蠻夷間亦入  
塞為暴而州兵皆脆弱慵惰又乏糧食死亡輒

不補公為之簡閱州兵汰冗補闕籍諸州掠卒  
伉健者以為效用合親兵摧鋒等軍日習而月  
按之視諸州有不足於糧賜若戈甲之費者更  
許漕司鹽本羨錢以佐之傳今溪洞酋豪諭弭  
盜睦鄰毋得輒相讎殺生事而他所以立恩信  
謹關防亦無不備於是境內肅清方外柔服慕  
府無南鄉之慮矣  
晦庵文

節制諸司

予為鄜延經畧使日新一廳謂之五司廳延州  
正廳乃都督廳治延州事五司廳治鄜延路軍

事如唐之使忠五司者經畧安撫總管節度觀察處置五使今節度之職多歸總管司觀察歸安撫司處置歸經畧司其節度觀察兩案并支掌惟判官今皆治州事而已經畧安撫司不置佐官以帥權不可不專都總管副總管鈐轄都監同簽書而下皆受經畧司節制

沈括筆談

祖於瓊林

咸平四年以兵部尚書張齊賢充涇原儀渭邠寧環慶鄜延州保安鎮戎渭遠軍安撫經畧使知制誥梁顥副之帝以邊將玩寇朔方糧道艱阻故命齊賢等使焉即命發日馳騎而往仍命宣徽南院使周瑩祖於瓊林苑

歸裝無南物

李殿撰浩為廣南西路帥奉法循已律已甚嚴自嶺右歸裝無南物

歸不載南物

余靖知廣州唐之番舶裝船舊皆取稅公奏罷之以徠遠商又請立法戒當任官吏不得市南藥及公北歸不載南物

古今文集

○雜著

桂州新城記

王介甫

儂智高反南方出入十有三州而十有二州之  
守吏或死或不死而無一人能守其州者豈其  
材皆不足歟蓋夫城郭之不設兵甲之不戒雖  
有智勇猶不能勝一日之變也天子於是遂推  
選士大夫所論以為能者付之經畧而今尚書  
工部侍郎余公當廣西馬寇平之明年蠻越接  
和乃古城桂州以至和元年八月始作而以二  
年之六月成夫其為役亦大矣蓋公之信於民  
也久而費之欲以衛其財勞之欲以休其力以  
故為是有大費與大勞而人莫或以為勤也故  
文王之起也有四夷之難則城于朔方而以南  
仲宣王之起也有諸侯之患則城于東方而以  
仲山甫此二臣之德愷於其君於其為國之本  
末與其所先後可謂知之矣慮之以悄悄之勞  
而發之以赫赫之名乘之以翼翼之勤而續之  
以明明之功蓋其君臣如此而守衛之有其具  
也今余公亦以文武之材當明天子承平日久  
於補弊立廢之時鎮撫一方脩扞其民其勤於



今與周之南仲仲山甫盖等矣是宜有記也

○律詩

送張子智移師入桂 楊廷秀

握刀將帥迎牙纛龍尾名臣進寶奎虎頭移鎮  
赴溶溪解辦戎蠻貢象犀翠浪玉虹餘昨夢碧  
參羅帶入新題鳳池雞拊公栖處早箇雲飛不  
要梯

送鄭權尚書南海 王建

戍頭龍腦鋪關口象牙堆物設薰爐出蠻辭晚  
節開市喧山賊破金賤海船來白氍家家織紅  
蕉處處裁已將身報國莫起望鄉臺

送桂州嚴大夫 韓愈

蒼蒼森八桂茲地在湘南江作青羅帶山如碧  
玉簾戶多輸翠羽家自種黃柑遠勝登仙遠飛  
鸞不假驂

送靳尚書赴南海 韓愈

衙時龍戶集上日馬人來風靜鷓鴣去官廉蚌  
蛤回貨通獅子國樂奏越王臺事事皆殊異無  
嫌出大才

送嚴大夫赴桂州 白居易

地壓坤方重官兼憲府雄桂林無瘴氣栢省有  
清風山水衙門外旌旗艘艦中大夫應絕席詩  
酒更誰同

送徐大夫赴廣州 劉長卿

上將壇場拜南荒羽檄招遠方來百越元老事  
三朝霧遶龍川暗山連象郡遙

送鄭尚書出鎮南海 張籍

牙旆從城展兵符到府開蠻聲唵夜市海色潤  
朝臺

送李大夫赴廣州 杜甫

斧鉞下青冥樓船過洞庭北風隨爽氣南斗避  
文星

寄楊桂州 杜甫

五嶺皆炎熱宜人獨桂林梅花萬里外雪片一  
冬深

送鄭尚書赴南海 韓愈

番禺軍府盛欲說暫停盃蓋海旌旗出連天觀  
閣開

送嚴大夫 王建

嶺頭分界堠一半屬湘潭水驛門旗出山蠻洞

主參

送范經畧仲濟

蘇軾

廟堂選世將范氏真名賢仁風被宿麥綠浪搖

秦川

### 留守

#### 歷代沿革

**漢**和帝南巡張禹以太尉兼衛尉  
**留守****隋**大業九年代王侑留守西

京十二年李淵太原留守王威高君雅為副

**唐**太宗正觀十七年親征遼東置京城留守

以房元齡充蕭瑀為副其後車駕不在京都

則置留守以金吾大將為副咸亨二年高宗

幸洛陽以雍州長史李晦為西京留守其後

車駕發京都則置留守以右金吾大將軍為

副留守太原府亦置尹及少尹以尹為留守

少尹為副留守謂之三都留守**五代**晉天福

七年勅留守之任委寄非輕凡降絲綸宜同

將相今後除留守宜降麻制留守降麻自安

彥威始**宋**天子巡狩親征則命親王或大臣

總留守事建隆元年親征澤潞以樞密使吳

延祚為東京留守其西南北京留守各一人  
江南應天府尹各一人留守尹闕則置知副  
府事一人以郎中以上充通判各二人一掌  
留司一掌府事以朝官充留守司掌官鑰及  
京城守衛修葺彈壓之事畿內錢穀兵民之  
政建炎初京城有副留守以檢校少傅寧武  
軍節度使范訥充留守以侍衛親軍都指揮  
使遂安軍承宣使郭仲荀副之又有西京留  
守並係執政從臣充兼節制軍馬其後武林  
建鄴並建行宮武林視汴都而建鄴視三都

馬紹興四年參知政事孟庾為行宮留守從  
權措置百司事務六年有行宮同留守以左  
通奉大夫孟庾提舉萬壽觀兼侍讀充  
留守並權赴尚書省治事是年八月三省已  
降指揮三省樞密院常程事務並聽行宮留  
守司與決並權赴尚書省治事今大元有兩  
都留守同知留守副留守

羣書要語

山國用虎節周禮秦使杞子戍鄭  
掌北門之管傳謹守管鑰漢蕭何

房喬居守聖君無回顧之憂類要明皇東守命

開府以居留同上方委留鎮白集韓臯留守制

主鑰東門杜牧之集命爾居守俾之保綏陸集

賈耽制統禦都邑提持紀綱同上乃眷留都之

重歐公除劉沆制委以別京之重文彥博制處

居留之任賜彥博口宣守宮鑰之謹嚴文彥博

謝表眷是別都之重温公賜韓琦詔近付京都

之鑰荆公除李璋制

古今事實

別造玉符

傳符之制京都留守曰麟符隋煬帝幸遼東命

樊子蓋東都留守屬楊玄感作逆攻城子蓋備

禦有功車駕至高陽追詣行在所帝勞之比蕭

何寇恂且謂曰公宜持重戈甲五百人而後出

此亦勇夫重閉之義無賴不軌者便誅鋤之凡

可施行無勞形迹今為公別造玉麟符以代銅

獸六典

乃賜鐵券

郭子儀為京城留守自變生倉卒賴子儀復安

帝曰子儀固社稷臣因勞曰用卿晚故至此乃

賜鐵券圖形凌煙閣唐職林

卧總留臺

正觀中太宗幸玉華官房元齡以疾卧總留臺

並加持節

後魏高祖南伐以太尉元丕廣陵王羽留守京師並加持節

宜降絲綸

見泐革注

必賜旗甲

唐元和九年以尚書左丞呂元膺充東都留守舊制命留守必賜旗甲與方鎮略同及元膺受任終無所賜朝論以東有寇虞特用元膺不當削其儀制以阻威望諫官上疏曰華汝壽三州列賜戎械居守之重固宜寵借憲宗曰此數處並不當與其後遂皆停

付六府事

隋楊瓚居守帝謂之曰六府事殷一以相付朕將遂事東方無西顧之憂

職官分紀

治綠野堂

裴度字中立文宗時留守東都時閹豎擅威權天子擁虛器度不復有經濟意乃治東都綠野堂野服蕭散為之把酒不問人間事帝知度神

明不衰每人自洛來必問度安否

國之元老

唐元宗東巡宋璟為留守上臨發謂璟曰卿國之元老為朕股肱耳目今將巡洛邑為別歷時所有嘉謀嘉猷宜相告也璟因極言得失特賜綵絹等仍手制曰所進言書之坐右出入觀省以誠終身其見重如此

民號良吏

顧少連字夷仲為東都留守表閑田以利民號良吏

任關中事

漢與諸侯擊楚蕭何守關中以便宜施行上來以聞計戶轉漕給軍漢王數失軍遜去何常與關中卒輒補缺上以此剽屬任何關中事前蕭何傳

無西顧憂

光武曰昔高祖任蕭何於關東無復西顧之憂得專征山東終成大業

治尚寬簡

源乾曜留守京師治尚寬簡人安之

治以和簡

權德輿治以和簡人以寧便

戎政權服

劉政武德初留守太原調輯戎政遠近權服

號令精明

王翊字宏肱為東都留守既至開田二千餘屯修器械皆良金壽革練士卒號令精明吳少誠叛獨東畿為有備

罷守失望

裴度罷東都留守中人使幽鎮言軍中謂度在朝而兩河諸侯弱者懷強者畏今居東人人失望

宗社獲安

荀積留守京師掩獲沙門法秀謀反太后曰宗社獲安實卿之功

倉卒復安

郭子儀射生將王撫自署京兆尹亂京城子儀斬以徇帝以子儀為京城留守自變生倉卒賴子儀復安

賜書褒勞



杜暹帝東幸以暹為留守暹率當番衛士繕三宮城浚池督役不少懈帝數賜書褒勞

賜詔寵異

開城中東都留守牛僧孺徵拜左僕射上令左軍副使賁告身宣賜舊例留守入朝無中使賜詔上特寵異之唐會要

行留悉總

房元齡為相會伐遼留守京師詔曰公當蕭何之任朕無西顧之憂凡糧械飛輸行留悉裁總之

治行第一

張延賞為東都留守五年治行第一

或用舊德

唐故事居守之任或用舊德或用故相未嘗以武將而當保釐之重長慶二年以浚郊有事地逼封所以前義武軍節度使陳楚為東都留守且非舊制尋亦改焉續通典

可倚大事

太宗幸洛陽李大亮副房元齡居守元齡稱有王陵周勃節可倚大事

有利即行

高宗幸洛陽令河間王孝恭次子晦居守顧曰  
關中之事一以付卿令式之外有利於人者隨  
事即行不須聞奏晦累有異迹

久廢復行

崔從寶曆初為東都留守故事留司官入宮城  
門列晨衙見留守吏誕謾久廢至是復行

團結民兵

國朝葉夢得字少蘊號石林先生公留守建康  
團結松江民兵數萬至是呼集分據江津仍遣

其內機宜官模領數千人守馬家渡虜果遣吾  
叛將酈瓊以輕兵來犯覺有備而去言行錄

位置營壘

洪文安公遵知建康徧走郊野位置營壘民居  
及冢墓無相涉諸將不能易上賜手札曰寨地  
異同卿捷身任責非乃心王室疇克爾

全活數千

王沂國公公曾留守洛陽屬歲歉里有困  
積者饑者聚黨脅取鄰郡以強盜論公但重笞  
而釋之遠近聞以為法全活數千計並同上

條具十事

公知建康府赴闕奏事建康東南巨鎮南渡以來行宮在焉兼掌留鑰選用尤重公對於內殿敷陳時務當先定其規模為不可勝以待敵之可勝又條具十事上嘉納之

輦下清肅

鄭克撰呂尚書社行狀

李沆字太初謚文靖真宗朝戎人寇邊幸鄴沆以宰臣為東京留守不戮一人而輦下清肅

城上親督

劉錡領兵赴東京副留守任抵順昌府得報虜

已入東京公曰某本赴留司今東京既陷幸全軍至此有城池可守當同心力以死報國公親於城上督衆設戰具凡六日而賊至公遣擊之頗殺虜衆既而兀術親擁兵至公登城會諸將問策或謂宜具舟全師而歸公曰朝廷養兵正欲為緩急之用况已挫賊鋒軍聲稍振雖多寡不侔然有進無退公遣數百人出西門虜來接戰俄以數千人出南門士殊死鬪虜大敗橫屍盈野賊拔寨遁去

言行錄

畫像以事

王沂公再涖大名治政益信於俗民居軍伍咸  
畫像以事之時虜使每往復入境皆云此府王  
公在焉必沐浴潔服後入

捧纁以賜

范成大淳熙中帥江東兼行宮留守陞辭詔明  
日辭選德殿特設几開宴酒三行命侍行過西  
小軒曰此朕清坐處也再坐上曰勸卿一盃且  
有以爲侑公飲訖二內侍俸纁素來上有石湖  
二大字拜賜進謝上爲滿引復袖御書蘇軾詩  
一軸以賜

聘使書名

韓魏公鎮北門北門爲聘使道舊與京尹書皆  
押字不名及公留守則名于書其副使成禹錫  
來仍喻來介曰以侍中在此故特名及公去後  
留守引前比欲得其名強之不可

社稷所重

景德元年駕幸澶淵真宗謂王旦曰京師社稷  
所重非公不可並同上

特許行留

紹興六年中書門下省言秦檜孟庾並係兼行

宮留守詔特許張蓋

長於彈壓

紹興八年召呂頤浩付以建康頤浩入辭趙鼎曰頤浩之政長於彈壓建康名郡頗望其來上曰繁劇固以彈壓為先若不動聲色使百姓陰受其賜小人却不知也

中興系年錄

古今文集

○古詩

寄北都留守裴令公 白居易

天上中台正人間一品高休明值堯舜勲業過

蕭曹始擅文三捷終兼武六韜動人名赫赫憂國意切切寵重移宮鑰恩新換閫旄保釐東宅靜守護北門牢豹尾交牙戟虬髯捧佩刀通天白犀帶照地帶麟袍

送裴司徒令留守太原

劉禹錫

星使出關東兵符賜上公山河歸舊國管籥煥離宮行色旌旗動軍聲鼓角雄愛棠餘故吏騎竹見新童漢壘三秋靜胡沙萬里空其如天下望旦夕詠清風

○律詩

寄東都留守令狐相公

姚合

除書東守洛陽宮恩比藩方任更雄拜表出時  
傳七刻排班衙日有三公旌旗嚴重臨關外待  
府洪深接禁中

送薛尚書兼御史大夫東都留守

耿緯

副國威名重春卿禮樂崇賜珪推拜下分命遂  
居東高旆翻秋日清鏡自細風教用儒門雅兵

稱武庫雄誰云千載後周呂獨為公


○詩話

趙老燈臺

歸田錄俚諺云趙老送燈臺一去更不來不知  
是何等語雖士大夫亦往往道之天聖中有尚  
書郎趙世長者常以滑稽自負其老也求為西  
京留臺御史有輕薄子送以詩云此回真是送  
燈臺世長深惡之亦以不能酬酢為恨其後竟  
卒於留臺


春圃桔槔

熙寧初魏公罷相守北京新進多陵慢之魏公  
鬱鬱不得志嘗為詩曰花去曉叢蜂蝶亂雨勻  
春圃桔槔閑時人稱其微婉



新編古今事文類聚卷之七

外集





存  
台  
之

